

Heiqbhail

Gevq-a nail gaq

Haoqgavq niil keiv neq, khaq sil gaq-i mail gevq-a nail dai aqduq aqtsil tsil dai maq gevq-ai thaq-al. A.D. 200 kovq bhail neq, Leiqbhil nail jeq-e jaq-a pevq khi, aoldaoq kovqdaoq bhail heeq nia nail Bhaqnaqbhal-i mail gevq thaq nail dai, noeq nail ngaol. Thailhai ngaol-aoq, 400-1600 kovq nail gaiqlaq bhail Heiqbhail nail haoqgavq neq, Paolluv-i mail Heiqbhail nail tsaol-aq bhail gevq bhiq-a nail haoqgavq dai, khul nail ngaol. A.D. 1600 nail pultavq nee mail, yang gaol kev dai neq, Bhaqnaqbhal maq ngel haq neq, Aqpaolluv-i mail gevq thaq nail dai, noeq nail ngaol. Aqpaolluv neq, Jalliq aqlil bhail aqmeeq-ai heeq nia khi, Paolluv nee mail ganl nl daiq-a nail ngaol.

Gevq-a nail aqyanq

Gevq-a nail aqyanq neq, A.D. 70 kovq nail iqmoeq gevq-a nail ngaol. Khul khi mail dai ngal-aq neq, A.D. 70 kovq bhail uqhuq thaoq nail ilkhaol il ma genl dev peiv-a nail ganl maq gevq-ai thaq-al.

Khaq sil gaq bhail gevq bhiq-a nail

Haoqgavq niil keiv neq, Yuldav tsaol-aq Khali yaq juq bhail gevq bhiq-a nail ngaol. Aqyu juq iqmoeq-u phao, Yeiqsul neema thaqtsaol khi ngaol-aoq, haoqnao neq, aqlil khe-ai, Yuldav nail aol thaoq kovq ail khi mail, Yuldav nail aol khal

jiav nail khe-ai, nl nail hal nail laol nail sail nail haqbhoil neema aol lal bhiq-a nail ngaol.

Khul bhai noeqthunq khi gevq-a nail

Haoqgavq niil keiv neq, Yuldav tsaol-aq nail Philma juq, uqhuq thaoq nail ilkhaol il ma khi mail aoldaoq kovqdaoq nee maqtsil, eeq jaiq heel jaiq nail gaq neq, Yeiqsul ngaol dai, cavq naq bhiq-ai thaq nail haoqgavq ngaol. Al ovqtavq, laol nail sail nail nee tavq lai khi, Heeqphaq Yeiqsul aivq nail aqmaol laol bhiq-a nail ngaol dai, cavq naq-ai thaq nail ngaol.

Heeqphaq Yeiqsul bhai ya heeq kivq-a nail neq, meeq jaiq nail gailkhaol ngel-i mail, gailkhaol aqlil khaol bhai thaq gaoq kovq ail dai iqsanl, cavq nail cov nail haoqgavq ngaol.

Haoqgavq niil keiv nail lavqkhoel bhai, mee nia daoq neema thaqtsaol nail pha q ivq yaoq dai, gevq-ai thaq nail ngaol.

Yaqyov bhai juq khi Miqyail daoq ge nail ganl

¹ Milnee uqnee, Miqyail aivq nail haqbhoil gedan nail juq bhai juq khi, aqphiq aqbhal bhai mee nia pha q nail lavqkhoel, meeq nia pov daoq ge bhiq-a nail ngaol. ² Thailhai ngaol-aq, haoqnao naosaq khe aqn aqyanq niil nail lavqkhoel, aivq nail Yaqyov bhai juq khi, aivq ngadao bhai daoq ge lavq-a nail ngaol. Khal jaol khal jiav nail iqsanl, aivq bhai ovq nail jaiqbhoil bhi pevq nail dai, Miqyail aivq nail Yaqyov bhai tsel dov-a nail ngaol. Miqyail aivq bhai juq khi, bhoiq bhoiq luv luv bhai teivq-ai thaq nail ngaol.

³ Yaqyov nail lavqkhoel-ai Miqyail nail seiqleiq

khaoqsail bhaq dov lee-a nail ngaol. Miqyail khe-ai, Yaqyov iqsanl pevq naol. Bhaqaoq teevq bhee aol nail aivq nail daoq bhai juq khi, khal jaol khal jiav nail iqsanl bhai, Yaqyov heldaiq phail nail ngaol. Aivq neq, tsaol-aq yaq nail oeqbal bhai tsiqhaol gaq khi mail, iqsanl bhai uvthaiq nail Miqyail nail lavqmal phao jaoldeel lai-a nail ngaol.

Nqtavq gaqkhoel nee maqtsil Yaqyov eeq nail ganl

⁴ Nqtavq gaqkhoel nail aqmil nee maqtsil aivq-i mail ya-a nail aqmil neq, eeq jaiq mee q jaiq nail ngaol. Alhai dul dai, aqyu juq nee maqtsil aivq eeq jaiq mee q jaiq nail ngaol.

⁵ “Naol neq,
nqaq nail Yaqyov ngaol.
Yanqgaol naoq nail Aqbhu
pevq lal-a nail ngaol” dai,

Miqyail nqtavq gaqkhoel khul gaq bhai ge bhiq daiq-a nail-aiq.

“Ngal neq,
aivq nail Aqbhu pevq khi,
aivq neq,
nqaq nail Yaqyov
pevq nail ngaol” dai,

Miqyail nqtavq gaqkhoel khul gaq bhai ge bhiq daiq-a nail-aiq. Teevq gaq bhai gail maq ge daiq bhiq-al.

⁶ Al ovqtavq, iqmoeq ilmoeq doevq lee-a nail Yaqyov bhai miltsaq kovtavq-ai bhi lee-u phao,
“Nqaq nail
nqtavq gaqkhoel iqsanl mail

aivq bhai
 uqhuq thaoq yaoq” dai,
 Miqyail ge bhiq-a nail ngaol.

⁷ Nqtavq gaqkhoel nail ganl bhai Miqyail ge
 nail:

“Aivq nail
 nqtavq gaqkhoel bhai
 lilmoel khe-ai bhi pevq khi,
 aivq nail haqbhoil
 ganl nl nail juq bhai
 miqjaq miqlail khe-ai
 bhi pevq nail ngaol” dai,
 ge-ai thaq nail ngaol.

⁸ Thailhai ngaol-aoq, Yaqyov nail ganl bhai
 Miqyail nailhai ge-ai thaq nail ngaol:

“Miqyail-ol,
 naoq nail
 doiqbev bev ma neq,
 nqmaq maqluv halyeel
 ivq nail ngaol.
 Naol naoq nail
 milkhaoq bhai
 tsaq nail pha-q-i mail
 uvthaiq nail ngaol.

⁹ Naol neq,
 tsaq nail daol nail
 pha-q bhai gaiq-a khi,
 maq tsaq maq daol nail
 pha-q bhai neq,
 bhe nail ngaol.
 Alheel ngel-i mail,
 naoq nail Miqyail
 naoq nail aqtsaoq juq

nee maqtsil
 naoq bhai thaqeeq khi
 lavqkhiq bhiq tsail nail
 aqtseel hoeldav-ai
 thaq nail ngaol” dai,
 ge-ai thaq nail ngaol.

¹⁰ Al ovqtavq,
 “Heeqphaq-ol,
 iqmoeq ilmoeq-u nee
 naol miltsaq bhai teivq khi,
 nqtavq bha iqsanl
 naoq nail aqlavq-i mail
 teivq-ai thaq nail ngaol.

¹¹ Al juq peivq-ail
 boev-ail nail ngaol.
 Thailhai ngaol-aoq,
 naol neq,
 khaq mao iqsanl,
 ivq nail ngaol.
 Al juq iqsanl mail
 aqgaq aqdoi khe-ai,
 khail-ail nail ngaol.

¹² Phailkhaq kaolteiv
 teiv-ai thaq nail khe-ai,
 naol al juq bhai
 kaolteiv teiv khi
 lavqphal nail ngaol.
 Thailhai ngaol-aoq,
 naol neq,
 teevq thal-iq maq pov
 maq phal lal-ail.
 Naoq nail aqkovq aqlav
 teevq thal-iq maq gil-ail” dai,

ge-ai thaq nail ngaol.

¹³ “Naoq bhai

neejiav jiav nail tsaol-aq bhai
naoq nail aqkhill kov-uvq bhai
ngal bhi jaol-u phao kev dai,
ngaq nail lavqmal phao
jaoldeel yaoq” dai,

Miqyail nqtavq gaqkhoel khul gaq bhai ge bhiq
daiq-a nail-aiq. Maq ge bhiq daiq-al.

¹⁴ Nqtavq gaqkhoel iqsanl neq, hevqkovq nail
jaiqbhoil ovq nail tsaol-aq nail haqbhoil ganl bhi
nl nail dai khi, Miqyail-i mail khoel-ai thaq nail
gaqkhoel pevq nail maq ngel-ail lai.

2

Eeq deedee nail hevqkovq nail phaqq nail ganl

¹ Alheel ngel-i mail, ngadao-i mail ya gaiq-a
nail daoq bhai, maq ya jiiv dov-ail dai, aqmeeq-
ai ya naldaiq nail ngaol. ² Miqyail-i mail nqtavq
gaqkhoel bhai bhi ge-a nail daoq al daoq neq,
ivq nail ngel-i mail, daoq al daoq bhai nl bheeq
nail khul phaqq maqkhaiq, maq naldaiq nail
khul phaqq maqkhaiq, alhai maq meeq nail phaqq
nl nail tsaol-aq juq bhai, yovqgavq bhai geel-
nvq nail khe-ai, Miqyail-i mail yalkhaqq dal lavq
nail bhai ya daq nail ngaol. ³ Thailhai phal-
iq neq, ngadao mao-ail eeq mao-ail meeq nail
hevqkovq nail niil phaqq bhai maq naldaiq haqq
neq, khalhai khi jel-ail nia nail-aiq. Iqmoeq-u
phao nee, hevqkovq nail ganl al ganl Heeqphaqq
Yeiqsul ge bhiq-a nail ngaol. Al bhai ya gaiq-
a nail tsaol-aq, “Ganl al maldil tsaqq nail ngaol”

dai, nvjuq bhai ge lavq-a nail ngaol. ⁴ Miqyail iqsanl, bhi heeq bhi moel nail juq, noeq-u maq dov nail juq, bhaqaoq mao-ail eeq nail ganl juq khi, aivq neema tsaq nail khe-ai, Meeqnail Haolnail Aqhaqlal nail kovpavq juq bhoil bhiq-a nail al juq nl nail lavqkhoel nee, aivq salkhil tsao khanq-a nail ngaol.

Hevqkovq nail pha q ya dai, hevqdai q nail ga q

⁵ Yaqhao khe jiav lee nail miltsaq nail ganl niil aq-il nvjuq ge thailthai q nail ngaol. “Miltsaq al bhai uvthai q yaoq” dai, Miqyail nqtavq gaqkhoel bhai maq khoel-ail. ⁶ Thailhai ngaol-aq, tsaol-aq teevq gaq, Jalliq teevq dao nail lavqkhoel bhai niailhai salkhil khanq-ai tha q nail ngaol:

“Miqyail-ol, naol
tsaol-aq yaq nail haqbhoil
saol-nvq nail neq,
tsaol-aq yaq neq,
khul pevq nail-aiq.
Naol tsaol-aq nail
Yaqyov bhai
heldai q phail lee-a nail neq,
Tsaol-aq nail Yaqyov neq,
khul pevq nail-aiq.

⁷ Naol aivq bhai
teevq yanq nail lavqkhoel,
nqtavq gaqkhoel nee
micil tha qtheq-ai tha q-al
teevq-eel ngaol.
A bhai nee ngal-aq,
seiqlai q khaoqsail khi
tsiqeeq tsiqheel

bhiq nail heel uqtsaoq,
 naol aivq bhai
 bhi tsaoq-a nail ngaol.

⁸ Naol yaoq pha q yaoq-ao nee
 aivq nail aqkhill
 kov-uvq bhai bhi jaol
 bhi jiav-a nail ngaol" dai,
 ge-ai tha q nail ngaol.

Yaoq pha q yaoq-ao nee aivq nail kov-uvq bhai
 bhi jaol bhi jiav-a nail dai ge nail neq, aivq nail
 kov-uvq bhai ma q bhi jaol ma q bhi jiav-a nail
 teevq pha q iqsanl ma q jiav-ail dai, ge movq nail
 ngaol. Yaoq pha q yaoq-ao nee aivq nail kov-
 uvq bhai bhi jaol bhi jiav-a nail bhai niil aq-il
 ngadao ma q ya moel ha q-al. ⁹ Thailhai ngaol-
 aoq, Yeiqsul neq, Miqyail nail geeqlaoq eeljaol
 bha qda nee, tsaoq-a q ya q iqsanl nail haqbhoil
 sildan nail dai khi, teevq yanq nail lavqkhoel,
 nqtavq ga qkhoel nee micil tha qtheq-ai tha q-al
 teevq-eel ngaol. Aivq sil nail bhai kev dai, ya
 da q ga q-a nail ngel-i mail, seiqlai q khaoqsail khi
 tsiqeeq tsiqheel nail heel uqtsaoq, aivq bhai bhi
 tsaoq-a nail bhai, ngadao ya moel-a nail ngaol.

¹⁰ Khul khi mail dai ngal-a q neq, Miqyail aivq
 nail ya q maodai bhai seiqlai q khaoqsail jiav du q
 bhai hel-aivq-u phao, aqyu ju q bhai hevqkovq
 khi hel-aivq nail ga q, ha q nail ao q nail pha q
 da q nail lavqkhoel, Miqyail aivq bhai bhi bhee
 lal-a nail neq, tsaoq deede nee nail ngaol. Yaoq
 pha q yaoq-ao nee, Miqyail nail haqbhoil ngaol.
 Al ju q iqsanl mail aivq-i mail teivq-ai tha q nail
 ngaol. ¹¹ Bhi meeq bhi haol lal nail ga q khi
 aivq-i mail bhi meeq bhi haol lal-a nail ju q,

teevq gaq nail lavqkhoel nee taivq-ail dov lal-a nail ngaol. Alheel ngel-i mail, “Ngaq nail aqivq jaqbheq ngaol” dai, aqyu juq bhai khul nail bhai aivq maq haqsil-ail. ¹² Aivq ge nail:

“Ngal ngaq nail
 aqivq jaqbheq bhai
 naoq nail aqmil
 ge bhiq naol.
 Aqyu juq jil lai khi
 jaol nail gaoltsi bhai
 ngal naoq bhai daoqsel
 gul khi tsiqeeq naol” dai,
 ge nail ngaol.

¹³ Aivq teevq pov gaoq ge nail:
 “Ngal aivq bhai juq naol” dai,
 ge nail ngaol.

Al ovqtavq, teevq pov gaoq ge nail:
 “Heldaiq dei-eiq.
 Ngal khi Miqyail-i mail
 ngaq bhai bivq
 lavq-a nail yaq juq
 niilniai jaol naol” dai,
 ge nail ngaol.

¹⁴ Yaq al juq aqsivq haqjoil phi-nq thaq nail ngel-i mail, aivq iqsanl alhai dul dai, aqsivq haqjoil phi lee-a nail ngaol. Sil nail pha q bhai uvthaiq-ai thaq nail neivq heeqphaq nail bhaqaoq bhai lav cov-a nail haqbhoil, aivq alhai phi khi sil-a nail ngaol. ¹⁵ Al ovqtavq, sil nail pha q bhai geesil nail ngel-i mail, teevq yeel yaqkav yaq jiovq nail tsaol-aq bhai bhi jel-ail nail dai khi, aivq aqsivq haqjoil ya phi-a nail ngaol. ¹⁶ Khul khi mail dai ngal-aq, nqtavq

gaqkhoel bhai tsojao-ai nail dai khi, aivq lee-a nail maq ngel-ail. Aqbhaqlaqlaqaq nail jeq-e jaq-a bhai tsojao-ai lee-a nail ngaol. ¹⁷ Alheel ngel-i mail, aivq Miqyail nail ganl nl nail lavqkhoel gaoqhaq gaiq-a nia nail nee ovqtavq, saljial ivq nail Philma jiovq jiovq-ail, tsaol-aq nail oeqbal bhai phaiq bhiq nia dai, aivq yaoq phaqaq yaoq-ao nee nail lavqkhoel-ai aivq nail aqivq jaqbheq khe-ai, ya jiovq nail ngaol. ¹⁸ Khul khi mail dai ngal-aq neq, aivq neq, khoeq nail jiovq nail juq khi jalmul mul nail bhai ya daq daiq-a nail ngel-i mail, jalmul mul nail bhai ya daq thailthaiq nail tsaol-aq bhai tsojao-ai nia nail ngaol.

3

Molseiq nee maqtsil Yeiqsul eeq jaiq nail ganl

¹ Alheel ngel-i mail, Miqyail-i mail khul-ai thaqaq nail munl nail lavqkhoel bhai jaol nail, aivq nail tsaol-aq pevq nail aqivq jaqbheq juq-ol, Yeiqsul bhai saol-nvq daiq yaoq. Aivq neq, ngadao neema thaqtsaol nail aol phao khe gaqkhoel khi mail Philma ngaol. ² Molseiq Miqyail nail ilkhaol lavqkhoel khe ganl bhai saljial ivq nail khe-ai, Yeiqsul iqsanl aivq bhai tsel dov-a nail gaq nail sivatavq bhai saljial ivq nail ngaol. ³ Ilkhaol cov nail gaq, ilkhaol nee maqtsil seiqleiq khaoqsail eeq nail khe-ai, Molseiq nee maqtsil Yeiqsul neq, seiqleiq khaoqsail ya geel-nvq nail ngaol. ⁴ Khul khi mail dai ngal-aq neq, ilkhaol yaoq il yaoq-ao nee cov-a nail aqheel jaol nail ngaol. Alhai dul dai, yaoq phaqaq yaoq-ao nee bhai teivq-a nail gaq neq, Miqyail ngaol. ⁵ Molseiq neq, Miqyail nail

ilkhaol lavqkhoel saljial ivq nail yaqkav ngaol. Yaqhao Miqyail-i mail cavq lee nail ganl salkhil khang nail neq, aivq nail ganl ngaol. ⁶ Khali neq, Miqyail nail ilkhaol bhai heldaiq phail nail lavqkhoel saljial ivq nail Yaqyov ngaol. Ngadao juq iqsanl, geesil nail neema maq aol nail bhai maqkhaiq, ivqdao dai, noeqthunq nail phaqq bhai maqkhaiq, haoqnao naosaq-u kev dai, nieivq thaiq-ai thaqq haqq neq, ilkhaol al il pevq nail ngaol.

Miqyail nail yaqq juqq nail haqqbhoil gaqqnaqq naqq duqq jiav nail ganl

⁷ Alheel ngel-i mail, Meeqnail Haolnail Aqhaqlal-i mail ge-ai thaqq nail:

“Yanqgaol nuljuqq

aivq nail daoqq

ya gaiqq haqq neqq,

⁸ haqtsoiq haqqyal bhai

jaol-u phao,

aivq bhai laonqdaiq khi

neema lav phail-a nail

aqn khe-ai,

nuljuqq neema thaqq gaol.

⁹ A bhai, nuljuqq nail

aqphiqq aqbhal juqq

ngaaqq bhai laonqdaiq khi,

liqq tsel kovqq bhee dai,

ngaaqq-i mail nl-a

hal-a nail juqq bhai

ya moel-aqq nail ngaol.

¹⁰ Alheel ngel-i mail,

ngal al yeel nail tsaol-aqq bhai

neema phail lal khi
 ge bhiq-a nail:
 'Aqyu juq
 neema lavqkhoel bhai
 khaq mao iqsanl lai q-ail khi,
 ngaq nail gailkhaol bhai
 aqyu juq
 maq heeq nia-ail' dai,
 ngal ge nail ngaol.

¹¹ 'Aqyu juq
 ngaq nail aqduq bhai
 teevq thal-iq
 maq ya aol lal-ail' dai,
 neema phail nail
 lavqkhoel nee,
 ngal khanq-ai
 thaq nail ngaol" dai,
 ge-ai thaq nail ngaol.

¹² Aqivq jaqbheq juq-ol, nuljuq nail neema
 lavqkhoel bhai haqev nail pha q khi neema maq
 thaqtsaol nail neema maq ya aol dai, yaolphaol
 yaoq. Alheel nail neema aol haq neq, nuljuq
 khi aqdoevq doevq nail Miqyail nail gaiqlaq bhai
 pav-ail nia nail ngaol. ¹³ Oeqbal jalmul mul nail
 bhaqda nee, nuljuq nail lavqkhoel khe teevq gaq
 iqsanl neema maq ya gaol lal dai, yanqgaol dai
 ge kivq nail aqyanq niil nail lavqkhoel, yaoq n
 yaoq n nee nuljuq teevq gaq nee teevq gaq, gaq
 bivq yaoq. ¹⁴ Iqmoeq-u nee ngadao neema ivq
 nail khe-ai, haoqnao naosaq-u kev dai, neema
 ivq haq neq, Khali nee tavq nail tsaol-aq ngaol.
¹⁵ Jalliq lavqkhoel bhai niailhai gevq-ai thaq nail
 ngaol:

“Yanqgaol nuljuq
 Miqyail nail daoq
 ya gaiq haq neq,
 aivq bhai neema lav
 phail-a nail aqn al n khe-ai,
 nuljuq neema thaq gaol” dai,
 ge-ai thaq nail ngaol.

¹⁶ Ya gaiq khi ngaol-aog, aivq bhai neema lav phail-a nail tsaol-aq khaq sil gaq. Iljiltuv milkhaoq lavqkhoel khe Molsei-q-i mail hevq dol leevq-a nail tsaol-aq al juq, maq ngel-ail lai-q. ¹⁷ Liq tsel kovq bhee dai, Miqyail khaq sil gaq bhai neema phail-a nail-ai-q. Oeqbal nl khi haqtsoiq haqyal bhai sil-a nail tsaol-aq bhai, maq ngel-ail lai-q. ¹⁸ “Nuljuq ngaq nail naq duq bhai maq ya aol lal-ail” dai, aivq khal sil gaq bhai khanq-ai thaq nail-ai-q. Aivq nail daoq maq naldaiq nail tsaol-aq bhai khanq-ai thaq nail, maq ngel-ail lai-q. ¹⁹ Aqyu juq Miqyail bhai neema maq thaqtsaol nail ngel-i mail, maq ya aol lai-a nail ngaol dai, ngadao noeq heeq noeq moel kivq nail ngaol.

4

¹ Miqyail-i mail saljial jaq-ai thaq nail naq duq bhai aol lai kivq nail aqyanq jiav-u phao, nuljuq nail lavqkhoel khe teevq gaq ganav maq ya aol lai nail khul-il dai, ngadao juq iqsanl khaoqlaol nail tsaq nail ngaol. ² Khul khi mail dai ngal-aq neq, aqyu juq lavqkhiq tsail nail geeqlaog daoq yaq gaiq-a nail khe-ai, ngadao juq iqsanl ya gaiq-a nail ngaol. Thailhai ngaol-aog, aqyu juq-i mail ya gaiq-a nail daoq bhai aqyu juq neema

maq thaqtsaol nail ngel-i mail, aqyu juq nail haqbhoil ganl maq tsoiq-ail. ³ Neema thaqtsaol nail ngadao juq neq, gaqnaq naq duq al bhai aol lai thailthaiq nail ngaol. Alhai dul dai, aivq ge nail:

“Aqyu juq
 ngaq nail naq duq bhai
 teevq thal-iq
 maq ya aol lal-ail dai,
 neema phail nail
 lavqkhoel nee
 ngal khanq-ai
 thaq nail ngaol” dai,

ge-ai thaq nail ngaol. Miqyail neq, nqtavq miltsaq bhai teivq-u phao nee aivq nail ganl aivq nl gil-ai thaq khi ngaol-aog, niailhai ge nail ngaol.

⁴ Khul khi mail dai ngal-aq neq, “Miqyail aivq nail ganl iqsanl nl gil khi, sivq n n-gaol gaqnaq naq-a nail ngaol” dai, sivq n nail ganl, Jalliq teevq dao bhai gevq-ai thaq nail ngaol. ⁵ “Aqyu juq ngaq nail naq duq bhai teevq thal-iq maq ya aol lal-ail” dai, teevq pov gaoq gevq-ai thaq nail ngaol.

⁶ Iqmoeq-u phao nee lavqkhiq tsail nail geeqlaoq daoq ya gaiq-a nail tsaol-aq maq naldaiq-a nail ngel-i mail, aqyu juq maq ya aol lai khi ngaol-aog, ya aol lai nail tsaol-aq jaol nail ngaol.

⁷ Alheel ngel-i mail, Miqyail nv peiv peiv phal-a nail ngaol. Aqyanq maoq lal-u phao, Miqyail Daqbhil bhai juq khi, ge jel-ail ceevq-a nail khe-ai,

“Yanqgaol nuljuq
 aivq nail daoq

ya gaiq haq neq,
nuljuq neema thaq gaol” dai,

bhi ge-a nail ngaol. Aivq-i mail nv peiv peiv-a nail aqn al neq, yanqgaol ngaol.

⁸ Yaolsu aqyu juq bhai gaqnaq naq duq bhai hevq bhoel-aivq nail kheel nul neq, yaoq n yaoq nail ganl Miqyail maq ge yaoq-aol. ⁹ Alheel ngel-i mail, Miqyail nail yaq juq nail haqbhoil gaqnaq naq nail aqn jiav-ai haq nail ngaol. ¹⁰ Khul khi mail dai ngal-aq neq, Miqyail aivq ganl nl gil khi gaqnaq naq-a nail khe-ai, aivq nail naq duq bhai aol lai nail tsaol-aq iqsanl, yovqgavq nail ganl nl gil haq neq, gaqnaq naq nail ngaol. ¹¹ Alheel ngel-i mail, gaqnaq naq duq al bhai ya aol lai dai, ngadao laijai bhel. Maq laijai haq neq, aqyu juq maq naldaq dai, tsuq ail-a nail khe-ai, ngadao iqsanl teevq gaq ganav tsuq-ail nail ngaol.

¹² Khul khi mail dai ngal-aq, Miqyail nail daoq neq, aqdoevq doevq khi bhaqaq teevq bhee aol nail ngaol. Daoq al neq, nvq phao nvq phao-ail tav nail thaoma nee maqtsil tav khi, neema khi aqhaqlal bhai maqkhaiq, khil ceevq lavq ceevq khi haqeeq phulnaovq bhai maqkhaiq, coev pav khi bhoil pav nia nail ngaol. Neema lavqkhoel bhai saol-nvq nail juq khi oil movq nail juq bhai iqsanl tsel pav nia nail ngaol. ¹³ Khal teivq-ai thaq nail yaoq pha q yaoq-ao nee aivq nail sivtavq bhai oil tsail-ai thaq nail teevq pha q iqsanl maq jiav-ail. Ngadao juq yaqhao aivq bhai ya ge bhi nail ngaol. Aivq iqsanl mail bhaqlaoq khe dai, heeq nia moel nia nail ngaol.

Yeiqsul neq, Philma aqivq gaq ngaol

14 Ngadao juq mao-ail eeq mao-ail meeq nail Philma teevq gaq jaol nail ngel-i mail, ngadao-i mail neema thaqtsaol naol dai, ge-ai thaq nail bhai ivqdao dai, nieivq thaiq thaq gai bhel. Philma al gaq nqtavq kovtavq bhai aol lai-a nail ngaol. Aivq neq, Miqyail nail Yaqyov Yeiqsul ngaol. 15 Ngadao gaq bhaq-u phao, maq gaoqhaq nia nail Philma ngadao jaol nail, maq ngel. Ngadao jalmul mul nail yaoq pha q yaoq-ao nee ya khanq-a nail khe-ai, aivq iqsanl ya khanq-a nail ngaol. Thailhai ngaol-aog, aivq oeqbal maq nl daiq-al. 16 Alheel ngel-i mail, geeqlaoq eeljaol teevq bhee aol nail Miqyail nail doiqbev bev ma nail aqjail bhai, geesil nail neema maq aol nail lavqkhoel nee ngadao jil lai bhel. Ngadao aivq nail gaoqhaq gaiq-a nail geeqlaoq al, a bhai ya nail ngaol. Ngadao khal loq-u phao, aivq nail geeqlaoq eeljaol ya moel nail ngaol.

5

1 Tsaol-aq nail lavqkhoel nee tsel dov-ai thaq nail Philma aqivq khal jiovq-a nail yaoq gaq yaoq-ao nee, Miqyail nail ganl bhi nl nail dai khi, tsaol-aq yaq nail lavqkhoel khe tsel dov-ai thaq nail ngaol. Aivq tsaol-aq yaq nail oeqbal nail haqbhoil danq nail pha q danq khi, laol bhiq nail pha q laol nail ngaol. 2 Aivq iqsanl, gaq bhaq nail tsaol-aq ngel-i mail, maq heeq nia nail tsaol-aq khi nl bheeq-a nail tsaol-aq bhai gaoqhaq nia nail ngaol. 3 Aivq gaq bhaq nail ngel-i mail, tsaol-aq nail oeqbal nail haqbhoil laol bhiq nail khe-ai, yovqgavq nail haqbhoil iqsanl ya laol bhiq nail ngaol.

⁴ Tsaol-aq teevq gaq-ail, Philma nail alyaq al bhai yovqgavq bhai yovqgavq maq hav bhoel nia-ail. Miqyail Aqloq bhai khul-a nail khe-ai, aivq bhai iqsanl, Miqyail khul nail ngaol. ⁵ Khali iqsanl, alhai dul nail ngaol. Aivq bhai aivq thaq eeq khi Philma nail alyaq ya dai, nl-a nail maq ngel-ail.

“Naol neq,
 ngaq nail Yaqyov ngaol.
 Yanqgaol ngal
 naoq nail Aqbhu
 pevq lal-aq nail ngaol” dai,

aivq bhai ge bhiq-a nail Miqyail-i mail, alyaq bivq-a nail ngaol.

⁶ Alhai dul dai, yaoq dao yaoq-ao bhai aivq niailhai ge-ai thaq nail:

“Maqlaqkhilsaqdaiv
 Philma nail joiqjaq
 ovq nail khe-ai,
 naol nqmaq maqluv
 halyeel Philma ngaol” dai,
 ge-ai thaq nail ngaol.

⁷ Yeiqsul miltsaq kovtavq bhai aqdoevq doevq-u phao, sil nail pha q nail lavqkhoel nee aivq bhai bhi jel-ail nia nail Miqyail bhai, aqthel aqkav kav dai, gul gul-ail khi maivbhil dov nail lavqkhoel nee geeqlaoq hal deede-a nail ngaol. Aivq Miqyail bhai ev khi, Miqyail nail neenoeq nl-a nail ngel-i mail, aivq nail hal daoq bhai Miqyail naldaiq-a nail ngaol. ⁸ Aivq neq Miqyail nail Yaqyov pevq khi ngaol-aq, haq nail aoq nail pha q daq-a nail lavqkhoel, daoq naldaiq nail pha q bhai heeq nia lal-a nail ngaol.

⁹ Aivq alhai bhee lal khi, aivq nail daoq bhai khal naldaiq nail juq nail haqbhoil, aivq nqmaq maqluv halyeel Hevqkovq nail gaq pevq nail ngaol. ¹⁰ Maqlaqkhilsaqdaiv Philma jiovq nail joiqjaq ovq nail khe-ai, Miqyail aivq bhai Philma bhi jiovq-a nail ngaol.

Neema thaqtsaol nail pha q bhai maq ya khaonq ha dai, yaolphaol nail ganl

¹¹ Ganl niil ngal ge heeq pha q-ail maodai pha q jiv nail ngaol. Thailhai ngaol-a oq, nuljuq naqkov aqthul ngel-i mail, daoqceevq ge bhiq nail haq-ail nial. ¹² Aqyanq niidai maoq lal-a oq nail bhai saol-nvq-ai lai haq neq, nuljuq yu bhai cavq bhiq cov bhiq nail tsaol-aq pevq lal heeq pha q-ail tsaq nail ngaol. Thailhai ngaol-a oq, nuljuq neq, Miqyail nail daoq bhai tavq lai khi neq, iqmoeq ilmoeq ya saol nail ganl bhai kev dai, yu-i mail cavq bhiq covq bhiq nail bhai loq-ail haq nail niil. Nuljuq neq, aqjal aqgaol pha q maq jaq-ail. Aqtsil taivq-ail cuvq nail ngaol. ¹³ Aqtsil cuvq yaq yaoq gaq yaoq-ao nee yaqnoil ngel-i mail, tsaq nail daol nail pha q bhai maq heeq nia-ail haq-al. ¹⁴ Aqjal aqgaol neq, eeq lal-a nail tsaol-aq nail haqbhoil ngaol. Aqyu juq neq, heeq nia lal moel nia lal dai, mee nia pov ya saol-a nail ngaol. Alheel ngel-i mail, meeq nail pha q khi maq meeq nail pha q bhai tselpav nia nail ngaol.

6

¹ Alheel ngel-i mail, ngadao juq neq, Khali nail ganl daoqthaoq thaoq nail pha q bhai oil tha q-ail

ceevq khi, eeq lal heel lal khi bhee lal dai, nl-aivq bhel. Nl bheeq-a nail juq bhai, noeqpov nail pha q maqkhaiq, Miqyail bhai neema tha qtsaol nail pha q maqkhaiq, ² ulcuvq saol nail ganl cavq bhiq nail pha q bhai maqkhaiq, aqlavq bavq dav nail pha q bhai maqkhaiq, doevq kovq lal nail pha q maqkhaiq, nqmaq maqluv halyeel yalkhaq dal ceiv nail pha q bhai maqkhaiq, al juq bhai taivq-ail daoqthaoq thaoq thaoq-ail tha q gaoq jaol. ³ Miqyail neema tsa q ha q neq, ngadao al juq bhai khaonq ha-ail ceevq khi iqmoeq phao nl-aivq bhel.

⁴ Khul khi mail dai ngal-aq, aqbha q bhai teevq pov moel daiq-a nail nee ovqtavq, nqtavq kovtavq khe kovpavq bhai ya daiq khi, Meeqnail Haolnail Aqhaqlal bhai iqsanl ya-a nail tsaol-aq juq neq, ⁵ Miqyail nail mao-ail meeq nail daoq bhai maqkhaiq, yaqhao khe yeel nail bhaqaoq bhai maqkhaiq, ya khi ngaol-aq, ⁶ aqyu juq al juq bhai khaonq ha ha q neq, oeqbal teevq pov maq noeq pov kivq yaoq-aol. Khul khi mail dai ngal-aq, aqyu juq Miqyail nail Ya qyov bhai lavqyavq kovtavq-ai gaoq tavq heivq khi, milkhaoq ya q nail sivtavq bhai, teevq pov gaoq bhi haqsil nail khe-ai, dul nail ngaol.

⁷ Mee nia pov aol lee nail maoq-aol bhai ya siv khi, nl ja q keivq daol nail tsaol-aq juq nail haqbhoil ganl tsoiq nail aqheeq allu bhi heeq lee nia nail miltsaq bhai, Miqyail geeqlaoq bivq nail ngaol. ⁸ Thailhai ngaol-aq, miltsaq al aqgoe khi moeqga q taivq-ail doevq lal ha q neq, ganl ma q tsoiq nail ngel-i mail, iqkhail yavq nail bhai ya

daq nail aqjail jail lal-aoq nail ngaol. Haoqnao naosaq-u phao, miqjaq-i mail kheq ha nail ngaol.

⁹ Ngal mao-ail gaiq-a nail aqtsaoq juq-ol, nvjuq niailhai ge khi ngaol-aoq, nuljuq a dai nee maqtsil meeq nail pha q ya nail ngaol dai, nvjuq neema thaqtsaol nail ngaol. Meeq nail al pha q neq, hevqkovq nail pha q bhai tavq nail geeqlaoq ngaol. ¹⁰ Khul khi mail dai ngal-aq neq, Miqyail neq, tsaq nail daol nail ngaol. Nuljuq-i mail nl-a hal-a nail juq bhai aivq maq nioil peivq-ail. Miqyail bhai gaiq-a nail lavqkhoel nuljuq-i mail Khali yaq juq bhai tsojao-ai nail nee ovqtavq, niil aq-il iqsanl tsojao-ai bhiq nail ganl bhai aivq maq nioil peivq-ail. ¹¹ Nuljuq-i mail noeqthunq nail khe-ai pevq lal bhee lal dai, nuljuq yaoq gaq yaoq-ao nee haoqnao naosaq-u phao kev dai, laijai khi nl-ail nail bhai nvjuq oil movq deede-ail nial. ¹² Alheel ngel-i mail, aqdoil doil nail tsaol-aq tha q pevq lal. Neema thaqtsaol khi ol nail bha qda nee, Miqyail-i mail saljial jaq-ai tha q nail bhai ya-a nail tsaol-aq bhai, saol oil yaoq.

¹³ Miqyail Aqbhaqlaqhaq bhai saljial jaq-u phao, aivq bhai aivq juq khi khanq-a nail ngaol. Khul khi mail dai ngal-aq neq, aivq nee maqtsil eeq nail gaq maq jaol-ail. ¹⁴ "Ngal naoq bhai maldil geeqlaoq bivq naol. Ngal naoq bhai maldil bhi jeq bhi ov lee naol" dai, Miqyail saljial jaq-ai tha q nail ngaol. ¹⁵ Aqbhaqlaqhaq ol khi daonq-a nail ngel-i mail, Miqyail-i mail aivq bhai saljial jaq-ai tha q nail khe-ai, ya-a nail ngaol.

¹⁶ Tsaol-aq nail gaiqlaq bhai, saljial jaq-u phao, yovqgavq nee maqtsil eeq nail gaq bhai juq khi jaq nail ngaol. Alhai jaq-a nail ngel-i mail,

yaqhao jil pheeljaq nail pha q ma q jia v yao q-aol. ¹⁷ Mi qyail i qsanl, “Nga q-i mail noeqceiv-ai tha q nail pha q ma q pha l lal-ail” dai, saljial ya-ai tha q nail tsaol-aq bhai bhi heeq kivq movq-u pha o, aivq bhai aivq ju q khi kha nq-ai tha q nail ngaol. ¹⁸ Mi qyail-i mail saljial ja q-a nail pha q khi kha nq-a nail al nvq pha q bha qda nee, jel-ail nail pha q bhai tsa o q bhoel lavq khi iqmoe q pha o jia v nail noeqthunq nail pha q bhai ivqdao dai, nieivq thai q-ai tha q nail ngadao ju q bhai, ga q bivq lavq-a nail ngaol. Ma q pha l lal nia nail al nvq pha q bhai Mi qyail goiqbhao q ma q bha o q-ail. ¹⁹ Noeqthunq nail al neq, ngadao nail neema nail haqbhoil ivq khi ma q pha l ail nia nail hail nail khulu lu ma khe-ai, dul nail ngaol. Hail nail khulu lu ma al neq, haqpha l pha l ma tha o pav-ai tha q nail meeq dee haol deede e nail lavqkhoel pha o, khu tse-ai tha q nail ngaol. ²⁰ Maqlaqkhilsaqdaiv Philma nail joiqja q ovq nail khe-ai, Yeiqsul nqmaq maqluv halyeel Philma pevq khi, ngadao nail haqbhoil al bhai iqmoe q aol lai-a nail ngaol.

7

Maqlaqkhilsaqdaiv Philma nail joiqja q ovq nail ganl

¹ Maqlaqkhilsaqdaiv al ga q, Saqlai q* meeqq nail heeqpha q ngaol. Eeq nail heel nail Mi qyail nail Philma i qsanl ngel nail ngaol. Aqb-haqlaqha q heeqpha q ju q bhai genl dev ga q khi

* **7:1** 7.1 Saqlai q dai ge nail neq, neesal bhi ovq nail pha q bhai ge movq nail ngaol.

kovq lal thailthaiq-u phao, Maqlaqkhilsaqdaiv aivq bhai hav-ail khi, geeqlaoq bivq-a nail ngaol. ² Aqbhaqlaqhaq aivq-i mail genl khal dev ya-a nail juq iqsanl nail lavqkhoel khe tsel bhoil teevq bhoil aivq bhai bivq-a nail ngaol. Maqlaqkhilsaqdaiv dai, ge nail aqmil al neq, tsaq nail daol nail heeqphaq bhai ge nail ngaol. Al ovqtavq, Saqleiq nail heeqphaq dai, ge nail neq, neesal bhi ovq nail heeqphaq ngaol dai, ge movq nail ngaol. ³ Aivq neq, Aqbhu aqma maq bhao-ail. Jeq-e jaq-a iqsanl maq bhao-ail. Aivq nail doevq yeel neq, iqmoeq ilmoeq khi, haoqnao naosaq iqsanl maq bhao-ail. Aivq neq, Miqyail nail Yaqyov khe-ai khaq mao kev dai, Philma ngaol.

⁴ Aivq khadai eeq nail ngel-ail dai, saol-nvq daiq. Ngadao nail aqbhu Aqbhaqlaqhaq-i mail genl dev ya-a nail nlmaoq juq nail lavqkhoel khe, tsel bhoil teevq bhoil aivq bhai bivq-a nail ngaol. ⁵ Leiqbhil nail jeq-e jaq-a lavqkhoel Philma nail alyaq ya-a nail juq bhai, aqyu juq nail aqivq jaqbheq pevq nail llsaqleiqlal tsaol-aq juq, heeqlaoq gaoqjal, tsel bhoil teevq bhoil danq bhiq yaoq dai, aoldaoq kovqdaoq aqyu juq bhai daoq bivq-ai thaq nail ngaol. Aqyu juq, Aqbhaqlaqhaq nail jeq-e jaq-a pevq khi ngaol-aq, Philma bhai danq bhiq-a nail ngaol. ⁶ Maqlaqkhilsaqdaiv neq, Leiqbhil nail jeq-e jaq-a maq ngel khi ngaol-aq, Aqbhaqlaqhaq-i mail bivq-a nail tsel bhoil teevq bhoil oil khi, saljial ya-a nail Aqbhaqlaqhaq bhai geeqlaoq bivq-a nail ngaol. ⁷ Geeqlaoq bivq nail gaq neq, geeqlaoq ya nail gaq nee maqtsil eeq jaiq nail ngaol. Ganl niil khul dai jil nail maq jiav-ail. ⁸ Leiqbhil nail tsaol-

aq bhai tsel bhoil teevq bhoil danq bhiq-a nail neq, sil nia nail tsaol-aq bhai danq bhiq-a nail ngaol. Thailhai ngaol-aq, Maqlaqkhilsaqdaiv bhai danq bhiq-a nail al neq, Jalliq lavqkhoel bhai salkhil khanq-ai thaq nail khe-ai, teevq thaliq maq sil nail gaq bhai danq bhiq-a nail pha q pevq nail ngaol. ⁹ Yu bhai tsel bhoil teevq bhoil oil nail Leiqbhil iqsanl, Aqbhaqlaqhaq nee mail tsel bhoil teevq bhoil bivq-a nail ngaol dai, ge kivq nail ngaol. ¹⁰ Khul khi mail dai ngal-aq neq, Maqlaqkhilsaqdaiv Aqbhaqlaqhaq bhai hav ail-u phao, Leiqbhil aivq nail aqbhal Aqbhaqlaqhaq nail lavqkhoel bhai jaol-ai haq nail ngaol.

¹¹ Ilsaqlaiqlal tsaol-aq juq bhai bivq-a nail aoldaoq kovqdaoq neq, Leiqbhil nail jeq-e Philma jiovq nail bhai tavq lai khi, bivq-a nail aoldaoq kovqdaoq pevq nail ngaol. Leiqbhil tsaol-aq Philma jiovq thailthaiq-u phao, Ilsaqlaiqlal tsaol-aq bhee lal nia-ail nul neq, khul khi mail Philma yaoq gaq yaoq gaoq dov lal nail loq nail-aiq. Philma al gaq, Aqlaq Philma jiovq nail joiqjaq khe-ai maq dul lai-ail. Maqlaqkhilsaqdaiv Philma jiovq khi joiqjaq ovq nail khe-ai dul nail ngaol. ¹² Philma jiovq nail joiqjaq lav phal-u phao, aoldaoq kovqdaoq iqsanl ya lav phal nail ngaol. ¹³ Ngadao-i mail ge jel-ail ceevq-a nail al gaq, Leiqbhil nail jeq-e jaq-a maq ngel-ail. Aivq nail jeq-e jaq-a nail lavqkhoel, teevq gaq iqsanl laol duq bhai ganl maq nl daiq-al. ¹⁴ Khul khi mail dai ngal-aq neq, ngadao nail Heeqphaq Yeiqsul neq, Yuldav nail jeq-e jaq-a ngaol dai, ngadao aqduq duq dai, heeq kivq nail ngaol. Jeq-e jaq-a al Philma jiovq-a nail ganl

Molseiq khul teevq phaḡ iqsanl maḡ ge-ail.

Yeiqsul neḡ, Maḡlaḡkhilsaḡdaiv khe-ai dul nail ngaol

¹⁵ Maḡlaḡkhilsaḡdaiv Philma jioḡvḡ nail joiḡjaḡ ovḡ nail khe-ai, Philma nail joiḡjaḡ ovḡ nail nvḡ ḡaḡ teevḡ ḡaḡ dov lal-a nail ngel-i mail, Philma joiḡjaḡ phal-a nail ngaol dai, aḡmeeḡ-ai ya heeḡ kivḡ-a nail ngaol. ¹⁶ Tsaol-aḡ yaḡ nail aolsaolkovḡ-i mail aivḡ bhai Philma bhi jioḡvḡ-a nail maḡ ngel-ail. Teevḡ thal-iḡ maḡ cov-ai nia nail aḡdoevḡ doevḡ nail phaḡ nail bhaḡaḡ bhaḡda nee pevḡ lal-a nail ngaol. ¹⁷ Aivḡ nail ḡanl Miḡyail salkhil niailhai khanḡ-ai thaḡ nail ngaol:

“Maḡlaḡkhilsaḡdaiv
Philma nail joiḡjaḡ
ovḡ nail khe-ai,
naol nḡmaḡ maḡluv halyeel
Philma ngaol” dai,
khanḡ-ai thaḡ nail ngaol.

¹⁸ Milnee uḡnee khe bivḡ-ai thaḡ nail daoḡ al neḡ, ḡaḡ maḡ aol-ail, khul teevḡ phaḡ iqsanl ḡanl maḡ tsoiḡ nail ngel-i mail, Miḡyail daoḡ al daoḡ bhai khaonḡ ha-a nail ngaol. ¹⁹ Khul khi mail dai ngal-aḡ neḡ, aoldaoḡ kovḡdaoḡ neḡ, khul teevḡ phaḡ bhai iqsanl maḡ bhi bhee lal nia-ail. Al heel ngel-i mail, a dai nee maḡtsil meeḡ nail noeḡthunḡ nail phaḡ Miḡyail ḡaoḡ bivḡ-ai leevḡ-a nail ngaol. Noeḡthunḡ nail al phaḡ bhaḡda nee ngadao Miḡyail jaol nail bha jiiḡ laivḡ kivḡ nail ngaol.

²⁰ Al ovqtavq, Miqyail-i mail khanq-ai thaq nail daoq iqsanl jiaiv nail ngaol. Philma al juq bhai Philma kha bhiq-u phao, Miqyail-i mail khanq-ai thaq nail daoq maq jiaiv-ail. ²¹ Thailhai ngaol-aoq, Yeiqsul Philma nail alyaq al ya-a nail neq, khanq-ai thaq nail daoq al daoq jiaiv khi ya-a nail ngaol.

“Khanq-ai thaq nail
daoq al daoq neq,
Heeqphaq Miqyail-i mail
khanq-ai thaq khi,
aivq maq khanq phal yaoq-aol.
‘Naol nqmaq maqluv halyeel
Philma ngaol’” dai,

aivq bhai ge bhiq khi khanq-ai thaq nail ngaol.

²² Alheel ngel-i mail, meeq jaiq nail daoqma saljial al bhai ivq dai, Yeiqsul nl thailthaiq nail ngaol.

²³ Aq-u phao neq, Philma maodai gaq jaol khal lee-a nail ngaol. Khul khi mail dai ngal-aq neq, sil nail pha q bhaqda nee aqyu juq khaq mao iqsanl ganl maq nl nia-ail. ²⁴ Yeiqsul neq, khaq mao iqsanl Philma jio vq nail ngaol. Khul khi mail dai ngal-aq neq, aivq neq nqmaq maqluv halyeel doevq nail ngaol. ²⁵ Alheel ngel-i mail, aivq bhai juq khi Miqyail jaol nail bha khal lal nail tsaol-aq bhai Yeiqsul khaq mao iqsanl hevqkovq nia nail ngaol. Khul khi mail dai ngal-aq neq, aqyu juq nail haqbhoil geeqlaoq hal nail dai khi, aivq khaq mao iqsanl aqdoevq doevq nail ngaol.

²⁶ Alheel nail Philma ngadao juq loq-ail nial. Aivq neq aqmeeq aqhaol ngaol. Oeqbal khi aqcavq pha q maq aol-ail. Oeqbal yaq bhai

gaog ceiv ceiv-a nail ngaol. Miqyail aivq bhai nqtavq nee maqtsil moe nail dao bhai tsiq dav-ai thaq nail ngaol. ²⁷ Aivq neq, Philma yaoq juq yaoq khe-ai, iqmoeq yovqgavq nail oeqbal nail haqbhoil, haoqnao tsaol-aq nail oeqbal nail haqbhoil yaoq n yaoq n nee ya laol bhiq nail maq ngel-ail. Teevq pov taivq-ail aivq nail aqmaol laol bhiq-a nail ngaol. Yaqhao teevq pov iqsanl gaog laol bhiq nail maq loq yaoq-aol. ²⁸ Tsaol-aq yaq gaq bhaq khi ngaol-aog, Philma ya jiovq dai, aoldaoq kovqdaoq aqyu juq bhai alyaq bivq-a nail ngaol. Thailhai ngaol-aog, khanq-ai thaq nail daoq al daoq neq, aoldaoq kovqdaoq nail haoqnao lee khi, nqmaq maqluv halyeel bhee lovq nail Yaqyov bhai alyaq bivq-a nail ngaol.

8

Yeiqsul neq, ngadao nail Philma aqivq gaq ngaol

¹ Ngaq-i mail ge movq nail ganl ganl ma neq, niailhai ngaol. Niilheel nail Philma ngadao jaol nail ngaol. Aivq neq, nqtavq kovtavq bhai jaol khi, iqsanl bhai uvthaiq nail Miqyail nail doiqbev bev ma nail lavqmal phao jaoldeel-nvq thaq nail ngaol. ² Aivq neq, meeq nail haol nail saiqqov gov ma nail lavqkhoel bhai Miqyail nail ganl nl thailthaiq nail ngaol. Maldil saiqqov gov ma al neq, tsaol-aq-i mail cov-a nail maq ngel-ail. Miqyail-i mail cov-a nail ngaol.

³ Danq nail pha q bhi danq khi, laol nail pha q bhi laol nail dai khi, Miqyail-i mail Philma yaoq gaq yaoq-ao bhai tsel dov-ai thaq nail ngaol.

Alheel ngel-i mail, Philma Yeiqsul iqsanl laol bhiq nail teevq pha q ganav ya jia v nail ngaol. ⁴ Aivq miltsaq kovtavq bhai jaol nail kheel nul neq, Philma maq ya jio vq-ail. Khul khi mail dai ngal-aq neq, aoldaoq kovqdaoq ge-ai tha q nail khe-ai laol bhiq nail Philma juq jaol nail ngaol. ⁵ Aqyu juq neq, nqtavq kovtavq bhai jia v nail saiqgov gov ma khe-ai dul nail saiqgov lavqkhoel bhai ganl nl thailthaiq nail ngaol. Saiqgov al neq, nqtavq kovtavq bhai jia v nail saiqgov gov ma nail maolkhoel ngaol. Molveiq saiqgov gov ma cov nail dai, khi-u phao, “Gaoqja oq kovtavq-ai na oq bhai bhi moel-a nail maolkhoel khe-ai dul dai iqsanl bhai, aqmeeq-ai cov yaoq” dai, Miqyail Molveiq bhai ge bhiq-a nail ngaol. ⁶ Miqyail khi aivq nail tsaol-aq nail gaiqlaq bhai Yeiqsul-i mail lainq-ai tha q nail daoqma saljial al neq, mee q jai q bhee jai q nail saljial nail daoq bhai juq khi nl-ai tha q nail ngel-i mail, daoqma saljial aqlil nee maqtsil mee q jai q bhee jai q nail daoqma saljial pevq nail ngaol. Alhai dul dai, Philma al juq-i mail nl nail ganl nee maqtsil ee q jai q nail ganl, Yeiqsul bhai av bhiq-a nail ngaol.

⁷ Iqmoeq-u phao ge bhiq-a nail daoqma saljial al ge duq maq jia v-ail, kheel nul neq, nvq pov teevq pov daoqma saljial ge bhiq nail maq loq-ail. ⁸ Thailhai ngaol-a oq, Miqyail aqyu juq bhai oe qbal tha q tha q-ail ge nail:

“Heldai q yaoq.
 Ilsaqlaiqlal nail
 jeq-e jaq-a khi
 Yuldav nail
 jeq-e jaq-a bhai,

daoqma saljial aqsivq
 ngal jaq nail aqn
 kev lee nail ngaol.

⁹ Daoqma saljial
 aqsivq al neq,
 aqyu juq nail
 aqphiq aqbhal nail
 aqlavq bhai nieivq thaiq khi
 Iljiltuv milkhaoq
 lavqkhoel nee
 hevq dol-aivq-u phao,
 ngal aqyu juq bhai
 jaq-a nail daoqma
 saljial khe-ai, maq dul-ail.
 Khul khi mail dai
 ngal-aq neq,
 ngaq-i mail jaq-a nail
 daoqma saljial khe-ai,
 aqyu juq maq nl-ail.
 Alheel ngel-i mail,
 ngal aqyu juq bhai
 khaonq ha-a nail ngaol dai,
 Heeqphaq Miqyail
 ge nail ngaol.

¹⁰ Aqyanq al jel ail-u phao,
 ngal llsaqlaiqlal nail
 jeq-e jaq-a bhai
 daoqma saljial aqsivq
 niailhai jaq-a nail ngaol.
 Ngaq nail aoldaoq kovqdaoq
 aqyu juq nail neenoeq
 needul lavqkhoel bhai
 oil bhoel bhiq khi,

aqyu juq nail
 neema kovtavq bhai
 gevg bhiq nail ngaol.
 Ngal neq, aqyu juq nail
 Miqyail pevq khi,
 aqyu juq iqsanl
 ngaq nail tsaol-aq
 pevq nail ngaol.

¹¹ 'Heeqphaq Miqyail bhai
 heeq kivq thaq-ai yaoq' dai,
 yovqgavq nail
 jeq-e jaq-a nail
 gaiqlaq bhai maqkhaiq,
 aqivq jaqbheq nail
 gaiqlaq bhai maqkhaiq,
 teevq gaq nee teevq gaq
 cavq bhiq cov bhiq nail
 maq loq-ail.

Khul khi mail dai
 ngal-aq neq,
 aqyu juq nail lavqkhoel khe
 eeq yaq nil yaq iqsanl mail
 ngaq bhai heeq nia nail ngaol.

¹² Ngal aqyu juq nail oeqbal
 phaiq bhiq khi mail
 aqyu juq-i mail
 nl-a nail laiq nail
 tsa nail pha q bhai
 maq noeq thaq-ail" dai,

Miqyail ge-ai tha q nail ngaol.

¹³ Miqyail daoqma saljial aqsivq bhai jaq-u
 phao, iqmoeq-u phao ge bhiq-a nail daoqma
 saljial al aqlil ngaol dai, ge movq nail ngaol.

Maoq lal khi aqlil lil lal-a nail pha q neq, peivq-ail nail aqjail jail lal-aoq nail ngaol.

9

Miltsaq kovtavq khe sai qgov gov ma lavqkhoel bhai uqhuq thaoq nail ganl

¹ Iqmoeq-u phao nee ge bhiq-a nail daoqma saljial lavqkhoel bhai Miqyail bhai uqhuq thaoq nail aol juq aol nail ngaol. Tsaol-aq yaq-i mail cov-a nail uqhuq thaoq nail sai qgov gov ma iqsanl jia v nail ngaol. ² Sai qgov gov ma al nail lavqkhoel-ai, iqmoeq-u khe kev lee nail jaol duq bhai neq, phalmanq tsiq dav duq, kovqkhail khi laol bhiq-ai tha q nail khaqmul jia v nail ngaol. Jaol duq al duq bhai neq, meeq nail haol nail jaol duq dai, khul nail ngaol. ³ Sai qgov gov ma nail lavqkhoel khe, thaoq pav-ai tha q nail haoqnao khe jaol duq neq, meeq dee haol deede nail jaol duq dai, khul nail ngaol. ⁴ Al nail lavqkhoel, heel leivq-ai tha q nail huqbhiq nil nail pha q laol bhiq duq khi, thunq heeq lao lao-ail heel leivq-ai tha q nail daoqma saljial nail thunq jia v nail ngaol. Thunq al heeq nail lavqkhoel bhai, maqnav khaqmul aol nail heel iqloq, da q tsuq tsuq nail Aqloq nail joiqniovq khi, daoqma saljial gevq-ai tha q nail lovmav dailpav aol nail ngaol. ⁵ Thunq al heeq nail kovtavq bhai, seiqlaiq khaogsail ee q nail Kheiqulubheiq dai khul nail maolkhoel nvq maol bhi jia v-a nail ngaol. Aivq nail aqdao neq, oeqbal phai q duq dai khul nail thunq al thunq nail kovtavq bhai uvthaiq-ai tha q

nail ngaol. Ganl niil juq iqsanl mail niil aq-il nuljuq bhai maq ge bhiq-ail.

⁶ Al juq bhai alhai lav sav-ai thaq nail ngaol. Philyaq juq yovqgavq nail ganl nl dai, saiqgov gov ma iqmoeq khe kev lee nail jaol duq bhai khaq mao iqsanl, aol lai nail ngaol. ⁷ Thailhai ngaol-aog, nvq dao teevq dao bhai neq, Philma gaq taivq-ail aol lai nia nail ngaol. Aivq aol lai-u phao, aivq nail haqbhoil maqkhaiq, tsaol-aq yaq-i mail maq heeq nia dai, nl laiq-a nail oeqbal nail haqbhoil maqkhaiq, laol bhiq nail aqsivq oil laivq nail ngaol. A bhai neq, teevq kovq teevq pov taivq-ail ya aol lai-ail teevq-eel ngaol. ⁸ Alhai nl-a nail bhaqda nee, iqmoeq-u phao nee cov-ai thaq nail saiqgov gov ma al maq peivq ha-u kev dai neq, meeq dee haol deede nail jaol duq bhai aol lai nail gailkhaol maq daol lal haq-al dai, Meeqnail Haolnail Aqhaqlal phaodaiq lavq-a nail ngaol. ⁹ Ganl al juq neq, niil yeel nail haqbhoil daoqma uqhuq daoq teevq-eel ngaol. Al bhai danq bhiq nail pha q danq bhi khi laol bhiq nail pha q laol bhiq khi ngaol-aog, al juq neq, Miqyail bhai uqhuq thaoq lai nail tsaol-aq nail heeq nia nail neema bhai neekhaol teevq sil maq nl bhee nia-ail. ¹⁰ Al juq neq, jaq nail daol nail pha q maqkhaiq, tsiq haol nail mee nia pha q maqkhaiq, aqsivq haqjoil phao taivq-ail tavq nail aol juq pevq nail ngaol. Aqsivq maq lav phal nail gaiqlaq bhai, aol al juq bhi thaoq-a nail ngaol.

Khali nail aqsivq nail ganl

¹¹⁻¹² Thailhai ngaol-aog, Khali neq, niil aq-il khe kev lee-a nail aqmeeq pha q bhai tavq nail

Philma aqivq gaq khe-ai, lee-a nail ngaol. A bhai nee ngal-aq, aivq eeq jaiq bhee jaiq nail saiqqov gov ma bhai lai pav khi, teevq pov taivq-ail meeq dee haol deedee nail jaol duq bhai aol lai-a nail ngaol. Saiqqov gov ma al neq, aqlavq-i mail cov-a nail maq ngel-ail. Miltsaq nee tavq nail iqsanl maq ngel-ail. Aivq meeq dee haol deedee nail jaol duq bhai aol lai-u phao, civqmeiv khi niaoqnel niaoq yaq nail aqsivq oil khi aol lai-a nail maq ngel-ail. Aivq aivq nail aqsivq oil khi aol lai-a nail ngel-i mail, ngadao nqmaq maqluv halyeel hevqkovq nail pha q ya dai, aivq nl-a nail ngaol. ¹³ Khul khi mail dai ngal-aq neq, civqmeiv khi niaoqnel laqsil nail aqsivq maqkhaiq, niaoqnel niaoqkhal laol bhiq-a nail lailmevq maqkhaiq, aolsaolkovq phao maq meeq maq haol nail tsaol-aq bhai haiq bav bhiq-u phao, aqsivq haqjoil phao meeq lal haol lal dai, nl nia haq neq, ¹⁴ Khali nail aqsivq neq, a dai nee maqtsil khadai nl nia nail-aiq. Aivq neq, nqmaq maqluv halyeel doevq nail Aqhaqlal Miqyail bhai juq khi, malbavq teevq peivq-ail maq daol nail, aivq nail aqmaol Miqyail bhai laol bhiq-a nail ngaol. Aivq nail aqsivq neq, ngadao nail heeq nia nail neema lavqkhoel bhai aol nail bheeq nail leel nail juq bhai tsiq haol bhiq khi, aqdoevq doevq nail Miqyail nail haqbhoil nl nia hal nia dai, nl lavq-a nail ngaol.

¹⁵ Iqmoeq-u phao jaq-ai tha q nail daoqma saljial nail kov-uvq bhai ngadao jaol-u phao, bheeq nail leel nail juq nail lavqkhoel ngadao bhai bhi jel-ail nail dai khi, Yeiqsul khanq sil-a nail ngaol. Alheel ngel-i mail, khul-ai tha q

nail tsaol-aq bhai, “Ngal nuljuq bhai bivq naol” dai, Miqyail-i mail ge-ai thaq nail nqmaq maqluv halyeel ivq nail jaiqbhoil ya dai, Yeiqsul neq, daoqma saljial aqsivq nail gaiqlaq khe tsaol-aq ngaol.

¹⁶ Jaiqbhoil bivq naol dai, ge ceiv-ai thaq nail haoqgavq jiaiv haq neq, jaiqbhoil bivq nail gaq maldil sil-aoq thaq nial dai, iqmoeq-u phao nee ya heeq kivq nail ngaol. ¹⁷ Khul khi mail dai ngal-aq neq, jaiqbhoil niaillhai bivq naol dai, haoqgavq gevq-ai thaq nail khe-ai, bivq nail aqheel gaq sil haq neq, jaiqbhoil bivq nia nail ngaol. Bivq nail aqheel gaq maq sil nail gaiqlaq, gevq-ai thaq nail khe-ai jaiqbhoil maq bhoil bhiq kivq-ail. ¹⁸ Iqmoeq-u phao jaq-ai thaq nail daoqma saljial al iqsanl, aqsivq maq dov dai, nl khal leevq-a nail maq ngel-ail. ¹⁹ Khul khi mail dai ngal-aq neq, aoldaoq kovqdaoq lavqkhoel-ai ge bhiq-a nail daoq yaoq daoq yaoq-ao nee, Molseiq Ilsaqlaiqlal tsaol-aq iqsanl bhai ge bhiq khi, niaoqnel niaoq yaq khi civqmeiv nail aqsivq ulcuvq kheq khi, neltsaiq deel yaol yaq nail aqmevq khi lunl nail aqnaiq-i mail haoqgavq pavqjiov khi tsaol-aq al juq bhai maqkhaiq, aivq jivq bav bhiq-a nail ngaol. ²⁰ “Aqsivq al neq, nuljuq bhi tsaothe nail haqbhoil, Miqyail-i mail nuljuq bhai jaq-ai thaq nail daoqma saljial bhai tavq nail aqsivq ngaol” dai, ge bhiq-a nail ngaol. ²¹ Saiqgov gov ma khi a bhai khal yuq nail nlmaoq iqsanl bhai, alhai dul dai, aivq aqsivq jivq bav-a nail ngaol. ²² Aoldaoq kovqdaoq bivq-ai thaq nail khe-ai, iqsanl mail dai ge kivq dai, aqsivq-i mail tsiq haol-a nail ngaol. Aqsivq dov

nail phaḡ maḡ jiav haḡ neḡ, oeqbal phaiḡ nail phaḡ maḡ jiav-ail.

Oeqbal bhai oil ha nail dai khi, Yeiqsul aivḡ nail aqmaol laol bhiḡ-a nail ganl

²³ Nḡtavḡ kovtavḡ khe maolkhoel juḡ bhai tsiḡ haol nail dai khi, alheel juḡ ya nl haḡ neḡ, nḡtavḡ kovtavḡ khe maldil juḡ bhai tsiḡ haol dai, a dai nee maḡtsil meeḡ nail laol bhiḡ nail phaḡ ya jiav nail ngaol. ²⁴ Khul khi mail dai ngal-aḡ neḡ, aḡlavḡ-i mail lav sav-ai thaḡ nail meeḡ nail haol nail jaol duḡ bhai Khali aol lai-a nail maḡ ngel-ail. Jaol duḡ al neḡ, maldil deel jaol duḡ al nail maolkhoel teevḡ-eel ngaol. Aivḡ niil aḡ-il ngadao nail haḡbhoil Miḡyail nail sivtavḡ bhai aqmaol moel dai, nḡtavḡ kovtavḡ bhai aol lai-a nail ngaol. ²⁵ Philma neḡ, yovḡḡavḡ nail aḡsivḡ maḡ oil dai, jaiḡyaḡ nail aḡsivḡ oil khi, meeḡ dee haol deedeē nail jaol duḡ bhai yaoḡ kovḡ yaoḡ-ao nee aol lai nail ngaol. Thailhai ngaol-aḡ, Khali neḡ, aivḡ nail aqmaol alhai mee nia pov ya laol bhiḡ nail maḡ ngel-ail. ²⁶ Alhai ya laol bhiḡ nail kheel nul neḡ, nḡtavḡ khi miltsaḡ teivḡ-u phao nee aivḡ mee nia pov ya khaḡ sil nail ngaol. Thailhai ngaol-aḡ, oeqbal oil ha nail dai khi, haoḡnao naosaḡ khe aḡyanḡ niil nail lavḡkhoel, aivḡ teevḡ pov taivḡ-ail dov lee khi, aivḡ nail aqmaol laol bhiḡ-a nail ngaol. ²⁷ Ngadao tsaol-aḡ teevḡ pov ya sil khi, yaḡhao yalkhaḡ dal nail bhai ya daḡ nail ngaol. ²⁸ Alhai dul dai, tsaol-aḡ nail oeqbal bhai phi ha nail dai khi, Khali aivḡ nail aqmaol teevḡ pov taivḡ-ail laol bhiḡ nail bhai ya daḡ-a nail ngaol. Aivḡ nvḡ pov teevḡ pov yavḡ

kha lee-u phao, oeqbal bhai teevq peivq-ail maq tavq-ail yavq kha lee khi, aivq bhai noeqthunq nail tsaol-aq bhai hevqkovq nail ngaol.

10

¹ Aoldaoq kovqdaoq neq, yaqhao khe kev lee nail aqmeeq juq bhi pevq lal nail maq ngel-ail. Al juq nail maolkhoel teevq-eel ngaol. Alheel ngel-i mail, yaoq kovq yaoq-ao nee, laol bhiq nail pha q laol nail neq, uqhuq thaoq lai nail tsaol-aq bhai teevq thal-iq maq bhi bhee lal nia-ail.

² Agyu juq bhee-ail nul neq, agyu juq laol bhiq nail pha q maq laol yaoq-aol, maq ngel-ail laiq. Uqhuq thaoq nail tsaol-aq teevq pov mee q lal haol lal gaq haq neq, oeqbal aol naol dai, agyu juq teevq thal-iq maq noeq yaoq-aol. ³ Thailhai ngaol-aog, yaoq kovq yaoq-ao nee, laol bhiq nail pha q laol bhiq-u phao, “Nvjuq oeqbal aol lao tha q nail niil” dai, agyu juq noeq dov lal nail ngaol. ⁴ Khul khi mail dai ngal-aq neq, niaoqnel nail aqsivq khi civqmeiv nail aqsivq neq, oeqbal bhai teevq thal-iq maq tsiq haol nia-ail.

⁵ Alheel ngel-i mail, Khali miltsaq kovtavq bhai doevq lee-u phao, Miqyail bhai ge bhiq-a nail:

“Miqyail-ol, naol neq,
laol bhiq nail pha q khi
danq nail pha q bhai,
oil movq nail maq ngel-ail.
Naol neq, ngaq nail haqbhoil
aqmaol lainq-ai tha q nail ngaol.

⁶ Miqjaq jao poiv khi
laol bhiq nail pha q khi
oeqbal nail haqbhoil

laol bhiq nail juq bhai
naol neekhaol maq sil-ail.

⁷ Alheel ngel-i mail,

ngal daoq niailhai

ge nail ngaol:

'Heldaiq dei-eiq.

Aoldaoq kovqdaoq nail

haoqgavq lavqkhoel bhai

ngaq nail ganl

gevq-ai thaq nail khe-ai,

Miqyail-ol,

naol neema tsaq nail khe-ai,

nl nail dai khi,

ngal lee-a nail ngaol' " dai,

ge-ai thaq nail ngaol.

⁸ Iqmoeq-u phao aivq-i mail ge-a nail: "Laol bhiq-a nail phaqq khi danq nail phaqq bhai maqkhaiq, miqjaq jaopoiv khi laol bhiq nail phaqq khi oeqbal nail haqbhoil laol bhiq nail juq bhai maqkhaiq, naol maq oil movq nail nee ovqtavq, neema maq tsaq" dai, ge-ai thaq nail ngaol.

Laol bhiq nail phaqq iqsanl aoldaoq kovqdaoq bhai tsaq lai dai, nl nail phaqq pevq khi ngaol-aoq, aivq alhai ge nail ngaol. ⁹ "Heldaiq dei-eiq. Naol neema tsaq nail khe-ai, nl nail dai khi, ngal lee-a nail ngaol" dai, aivq teevq pov gaoq ge-a nail ngaol.

Laol bhiq nail nvq phaqq teevq phaqq khaqq mao iqsanl ya ivq dai, laol bhiq nail iqmoeq khe phaqq bhai aivq khaonq ha-a nail ngaol. ¹⁰ Alhai nl nail bhai Miqyail neema tsaq nail ngel-i mail, Yeiqsul Khali neq, aivq nail aqmaol teevq pov taivq-ail

laol bhiq-a nail ngaol. Alhai laol bhiq-a nail ngel-i mail, ngadao meeq lal haol lal-a nail ngaol.

¹¹ Philyaq yaoq gaq yaoq-ao nee, yaoq n yaoq n nee laol duq bhai thulphaol khi, oeqbal bhai maq tsiq haol nia nail laol bhiq nail pha q bhai, laol nail ngaol. ¹² Thailhai ngaol-aoq, oeqbal pha iq bhiq nail khi, Yeiqsul nqmaq maqluv halyeel nail haqbhoil teevq pov taivq-ail laol bhiq nail pha q laol khi, Miqyail nail lavqmal phao jaoldeel-nvq tha q nail ngaol. ¹³ Aivq a bhai jaoldeel-nvq tha q nail neq, aivq bhai neejiav jiav nail tsaol-aq bhai Miqyail aivq nail aqkhill kov-uvq bhai bhi jaol-u phao kev dai, daonq nail ngaol. ¹⁴ Khul khi mail dai ngal-aq neq, laol bhiq nail teevq pha q taivq-ail laol nail lavqkhoel mee q lal haol lal nail tsaol-aq bhai nqmaq maqluv halyeel bhee nail tsaol-aq, aivq bhi pevq lal nail ngaol.

¹⁵ Meeqnail Haolnail Aqhaqlal iqsanl ngadao bhai alhai salkhil kha nq lavq-a nail ngaol. Iq-moeq ilmoeq aivq ge nail:

¹⁶ “Yaqhao ngal
 aqyu juq bhai ge bhiq nail
 daoqma saljial neq,
 niailhai ngaol.
 Ngaq nail aoldaoq kovqdaoq
 aqyu juq nail
 neema lavqkhoel bhai
 oil bhoel bhiq khi,
 aqyu juq nail
 neeno eq needul nail
 kovtavq bhai
 gevq bhiq naol dai,
 Heeqphaq Miqyail

ge nail ngaol.

¹⁷ Ngal aqyu juq nail oeqbal khi
 aqyu juq nail bheeq nail
 leel nail juq bhai
 maq noeƣ thaƣ-ail” dai,

Meeƣnail Haolnail Aqhaqlal gaoƣ ge nail ngaol.

¹⁸ Oeqbal al juq bhai phaiƣ gaƣ haƣ neƣ, oeqbal
 nail haƣbhoil laol bhiƣ nail phaƣ maƣ loƣ yaoƣ-
 aol.

Miqyail nail aƣjail bhai jiiv bhoel laivƣ yaoƣ

¹⁹ Alheel ngel-i mail, aƣivƣ jaƣbheƣ juƣ-ol,
 Yeiqsul nail aƣsivƣ bhaƣda nee, ngadao geesil
 nail neema maƣ aol dai, meeƣ dee haol deede
 nail jaol duƣ bhai aol lai kivƣ nail ngaol.

²⁰ Ngadao juq nail haƣbhoil Yeiqsul haƣphal
 phal ma nee jel lai khi aƣdoevƣ bhi doevƣ
 nail gailkhaol aƣsivƣ khaol lavƣ daol lavƣ-a nail
 ngaol. Ngadao gailkhaol al khaol nee mail aol lai
 kivƣ nail ngaol. Haƣphal phal ma al neƣ, Yeiqsul
 nail aƣmaol bhai ge nail ngaol. ²¹ Miqyail nail
 ilkhaol lavƣkhoel bhai, aƣivƣ jiovf-ai thaƣ nail,
 eeƣ dee heel deede nail Philma, ngadao jaol nail
 ngaol. ²² Alheel ngel-i mail, daolcoev deel neema
 khi ivƣdao deel neema thaƣtsaol nail phaƣ aol
 nail lavƣkhoel, Miqyail nail aƣjail bhai ngadao
 jiiv bhoel laivƣ bhel. Oeqbal bhai khaol
 nail phaƣ bhi tsiƣ haol gaƣ-a nail neema khi,
 haoltaiv deel ulcuvƣ-i mail bhi tsiƣ haol gaƣ-a
 nail aƣmaol lavƣkhoel ngadao jiiv bhoel laivƣ
 bhel. ²³ Ngadao-i mail hav bhoel-ai thaƣ nail
 noeƣthunƣ-ai thaƣ nail phaƣ bhai pov pov lav
 lav-ail maƣ pevƣ mail, ivƣdao dai nieivƣ thaiƣ-ai

thaq bhel. Khul khi mail dai ngal-aq neq, saljial jaq lavq-a nail Miqyail neq, saljial ivq nail ngaol. ²⁴ Al ovqtavq, goil nail gaiq-a nail neema aol khi aqmeeq pha q nl dai, teevq gaq nee teevq gaq saol-nvq khi gaq bivq bhel. ²⁵ Tsaol-aq teevq pav ganav juq geeqlaoq maq hal lai dai, jaol nail khe-ai, nuljuq alhai tha q jaol. Yalkhaq dal nail aqn al n kev lee nail aqjail jail lal-aq tha q nail ngaol dai, nuljuq heeq nia nail ngel-i mail, teevq gaq nee teevq gaq gaq bivq thailthaiq yaoq.

²⁶ Ngadao maldil tsa q nail pha q bhai heeq kivq khi ngaol-aq, yovqgavq nail neeno eq neelov taivq-ail oil khi oeqbal ga oq nl haq neq, oeqbal nail haqbhoil laol bhiq nail pha q maq jiav yaoq-aol. ²⁷ Mao-ail geesil lal nail yalkhaq dal nail pha q bhai daonq-ail teevq-eel ngaol. Aq-u phao, Miqyail bhai neejiav jiav nail tsaol-aq bhai neema phail deede e nail lavqkhoel miqjaq-i mail kheq ha nail ngaol. ²⁸ Miqyail-i mail Molseiq bhai bivq-a nail aoldaoq kovqdaoq bhai maq naldaiq dai, khaonq ha-a nail tsaol-aq neq, aivq-i mail khaonq ha-a nail ganl bhai salkhil khanq nail tsaol-aq nvq ga q hail ga q jaol haq neq, maq gaoqhaq dai, heivq nail bhai ya daq nail ngaol. ²⁹ Thailhai phal-iq neq, Miqyail nail Ya qyov bhai naoqthaiq khi, yovqgavq nail oeqbal bhai tsiq haol lavq nail Miqyail nail daoqma saljial bhai aqphoiq maq bhao dai saol-nvq khi, Miqyail nail geeqlaoq eeljaol bivq lavq nail Aqhaqlal Miqyail bhai khal ge movq-ail ge nail tsaol-aq bhai neq, khadai doil nail khoeq nail jiovq nail pha q bhai ya q daq nail ngel-ail dai, saol-nvq daiq yaoq. ³⁰ Khul khi mail dai ngal-aq neq, “Nl

kovq bhiq nail phaḡ neḡ, ngaḡ nail ganl ngaol. Ngal dal bhiq naol” dai, ge-ai thaḡ nail daoḡ bhai maḡkhaiḡ, “Miqyail aivḡ nail tsaol-aḡ bhai yalkhaḡ dal bhiq nail ngaol” dai, ge-ai thaḡ nail daoḡ bhai maḡkhaiḡ, khaḡ sil gaḡ-i mail ge-a nail bhai ngadao heeḡ kivḡ naol. ³¹ Aḡdoevḡ doevḡ nail Miqyail nail aḡlavḡ lavḡkhoaḡ bhai kev lai haḡ neḡ, mailma-ail geesil lal nail phaḡ pevḡ nail ngaol.

³² Jel lal-a nail aḡn aḡyanḡ bhai saol-nvḡ daiḡ yaḡḡ. Aḡ-u phaḡ, nuljuḡ Miqyail nail aḡbhaḡ bhai moel gaḡ-al ngal-aḡ neḡ, khaḡ nail jioḡḡ nail maḡdai phaḡ bhai ol ol-ail ya daḡ-a nail ngaol. ³³ Tsaol-aḡ iḡsanl nail sivtaḡḡ bhai, khal nl moḡḡ-ail nl lavḡ nail bhai maḡkhaiḡ, khaḡ lavḡ jioḡḡ lavḡ nail bhai maḡkhaiḡ, nuljuḡ ya daḡ daiḡ-a nail ngaol. Al ovḡtaḡḡ, alhai daḡ thailthaiḡ nail tsaol-aḡ nee mail teevḡ gaḡ khaḡ-ai, nuljuḡ iḡsanl tsaḡ daḡ-a nail ngaol. ³⁴ Nuljuḡ thaḡnḡ bhai aḡl nail tsaol-aḡ bhai noeḡ kev nail nee ovḡtaḡḡ, yu nuljuḡ nail nlmaḡḡ bhai luv dov lal khi ngaol-aḡ, nuljuḡ lavḡkhiḡ teevḡ tsail daḡ-a nail ngaol. Khul khi mail dai ngal-aḡ neḡ, ngadaḡ juḡ a dai nee maḡtsil meeḡ jaiḡ ivḡ jaiḡ nail nlmaḡḡ jiaḡ nail ngaol dai, nuljuḡ heeḡ nia nail ngaol.

³⁵ Alheel ngel-i mail, nuljuḡ neema ivḡdaḡ deel phaḡ bhai thaḡ khaḡnḡ ha. Khul khi mail dai ngal-aḡ neḡ, al bhaḡda nee nuljuḡ kovpaḡḡ laiḡ ma ya nail ngaol. ³⁶ Miqyail neema tsaḡ nail khaḡ-ai, nuljuḡ nl nail nee ovḡtaḡḡ, aivḡ-i mail saljial jaḡ-ai thaḡ nail phaḡ bhai ya kivḡ dai, nuljuḡ ol nail neema loḡ nail ngaol. ³⁷ Khul khi mail dai

ngal-aq neq, Jalliq lavqkhoel bhai niailhai gevq-
ai thaq nail ngaol.

“Lee nail dai,
lainq-ai thaq nail al gaq
aivq maq naq dai,
mao-ail maq maq lal mail,
kev lee nail ngaol.

³⁸ Ngaq nail tsaq nail
daol nail tsaol-aq
neema thaqtsaol nail
bhaqda nee,
aqdoevq ya doevq nail ngaol.
Aivq haoqnaol phao
jiiv kovq haq neq,
ngal aivq bhai teevq peivq-ail
neekhaol maq sil-ail” dai,
ge-ai thaq nail ngaol.

³⁹ Thailhai ngaol-aq, ngadao neq, haoqnao
phao jiiv kol-aivq khi luq-ail seil-ail nail tsaol-
aq maq ngel. Neema thaqtsaol nail ngel-i mail,
hevqkovq nail pha q bhai ya-a nail tsaol-aq ngaol.

11

Neema thaqtsaol nail pha q nail ganl

¹ Neema thaqtsaol nail neema aol nail bhaqda
nee noeqthunq-ai thaq nail juq bhai maldil ya
nail ngaol dai, aqduq aqtsil bhao nail ngaol.
Ngadao-i mail maq ya moel-a nail juq iqsanl,
maldil jaol naol jiav naol dai, aqduq aqtsil bhao
nail ngaol. ² Milnee uqnee khe jaol-a nail tsaol-aq
juq neema thaqtsaol nail neema aol nail bhaqda

nee, Miqyail aqyu juq bhai neekhaol sil nail ngaol.

³ Miqyail-i mail daoq bivq-a nail bhaqda nee, bhoiq bhoiq luv luv iqsanl jaol lal jiav lal-a nail ngaol dai, ngadao neema thaqtsaol nail ngel-i mail, heeq kivq nail ngaol. Alheel ngel-i mail, ngadao-i mail ya moel thailthaiq nail juq neq, maq moel kivq nail juq nail lavqkhoel nee dov lal-a nail ngaol. ⁴ Aqbheiqlal neema thaqtsaol khi Miqyail bhai laol bhiq-a nail ngel-i mail, aivq-i mail laol bhiq-a nail pha q neq, Gaqilnav-i mail laol bhiq-a nail pha q nee maqtsil, mee q jai q nail ngaol. Aqbheiqlal-i mail laol bhiq-a nail al bhai Miqyail hav bhoel-a nail bhaqda nee, aivq neq, tsa q nail daol nail tsaol-a q ngaol dai, Miqyail aivq nail ganl salkhil khanq-ai tha q nail ngaol. Alheel ngel-i mail, Aqbheiqlal sil khi ngaol-a q, aivq nail neema thaqtsaol nail ganl al, Jalli q lavqkhoel bhai daoq ge thailthai q nail ngaol.

⁵ Ilnaov neema thaqtsaol nail bhaqda nee, Miqyail aivq bhai maq bhi sil dai, nqtavq kov-tavq bhai hevq dal laivq-a nail ngaol. Miqyail aivq bhai hevq dal laivq-a nail ngel-i mail, yu aivq bhai maq halpov moel nia-ail. Miqyail aivq bhai maq hevq dal laivq-u nee mail, "Ngal aivq bhai neekhaol sil naol" dai, Miqyail salkhil khanq-ai tha q nail ngaol. ⁶ Tsaol-a q neema thaqtsaol nail neema maq aol ha q neq, Miqyail neekhaol sil dai maq nl kivq-ail. Khul khi mail dai ngal-a q neq, Miqyail bhai hal lai nail tsaol-a q, Miqyail doevq nail ngaol dai, neema ya tha qtsaol khi, Miqyail aivq bhai halpov nail tsaol-a q bhai

geeqlaoq bivq nail ngaol dai iqsanl, neema ya thaqtsaol nail ngaol.

⁷ Nol-avq neema thaqtsaol-a nail bhaqda nee, maq pevq lal daiq-a nail ganl juq Miqyail aivq bhai ge bhiq-u phao, ev nail lavqkhoel nee naldaiq khi, aivq nail phaqaq mayaq ya jel-ail dai, laovq laovq ma cov-a nail ngaol. Aivq-i mail neema thaqtsaol-a nail al neq, miltsaq yaq juq bhai yalkhaq bhi dal nail ngaol. Aivq neema thaqtsaol-a nail bhaqda nee, tsaq nail daol nail teevq gaq pevq lal-a nail ngaol.

⁸ Aqbhaqlaqaq neema thaqtsaol-a nail ngel-i mail, “Naoq bhai jaiqbhoil ovq nail milkhaoq bhai ail yaoq” dai, Miqyail aivq bhai khul-u phao, khaq bha ya ail nail dai, maq heeq nia khi ngaol-aog, Miqyail nail daoq bhai naldaiq khi, ail-a nail ngaol. ⁹ Aivq neema thaqtsaol-a nail ngel-i mail, aivq bhai saljial jaq-ai thaq nail milkhaoq lavqkhoel, yu nail milkhaoq bhai jaol nail daq-i khe-ai, jaol-a nail ngaol. Aivq neq, milkhaoq al khaq bhai aivq nee mail teevq gaq khe-ai, saljial ya nail gaq pevq nail Ilcav khi Yaqkov khe-ai saiqgov gov gov-ail jaol-a nail ngaol. ¹⁰ Khul khi mail dai ngal-aq neq, Aqbhaqlaqaq neq, Miqyail-i mail saol-nvq khi cov-ai thaq nail daoqthaoq thaovq ivq-ai thaq nail meeq bhai noeqthunq nail ngaol.

¹¹ Aivq nail khaqma Saqlal iqsanl neema thaqtsaol nail ngel-i mail, yaq jaol lee nail aqyanq jel-ail khi ngaol-aog, yaq ceiv lai-a nail ngaol. Khul khi mail dai ngal-aq neq, saljial jaq-a nail Miqyail saljial ivq nail ngaol dai, aivq neema thaq tsaol nail ngaol. ¹² Alheel ngel-i mail, yeel gil nail

aqjail jail lal-aog nail yaqyov-aq al gaq nail ovq nee, aqjievq lilheel maodai jaol lee-a nail ngaol. Aqyu juq nqtavq bha tsaiq nail aqgil khe-ai mao khi, iqyaq iqma daol bha bhai jiav nail tsalhail khe-ai, maq ge gil tsaol dai, jaol nail ngaol.

¹³ Tsaol-aq al juq neema thaqtsoal thaqtsoal-ail sil-a nail ngaol. Miqyail-i mail saljial jaq-ai thaq nail juq bhai aqyu juq maq ya khi ngaol-aog, al juq bhai egyal nee ya moel khi, hav lavq-a nail ngaol. “Nvjuq miltsaq kovtavq bhai jaol-u phao, yaoq khaog yaoq mil yaoq khe tsaol-aq khi daq-i jiovg thailthaiq nail ngaol” dai, aqyu juq ge nail ngaol. ¹⁴ Alhai ge nail tsaol-aq juq neq, yovqgavq nail milkhaoq bhai halpov thailthaiq nail ngaol dai, bhaqlaoq khe dai, dov lal-a nail ngaol. ¹⁵ Aqyu juq-i mail dov lee-a nail milkhaoq bhai noeqmoel lal haq neq, aqyu juq kovq lai nail aqyanq jiav nail ngaol. ¹⁶ Thailhai ngaol-aog, aqyu juq-i mail noeqthunq nail milkhaoq neq, a dai nee maqtsil meeq nail nqtavq kovtavq khe milkhaoq ngaol. Alheel ngel-i mail, “Naol nvjuq nail Miqyail ngaol” dai, aqyu juq ge nail bhai, Miqyail maq haqsil-ail. Khul khi mail dai ngal-aq neq, aqyu juq-i mail ya jaol lai nail meenq bhai aivq-i mail lav sav-ai thaq nail ngaol.

¹⁷⁻¹⁸ Aqbhaqlaqhaq neema thaqtsoal nail ngel-i mail, Miqyail aivq bhai laonqdaiq-u phao, Ilcav hevq khi laol bhiq lai-a nail ngaol. “Ilcav nail ovq nee doevq lee nail juq bhai taivq-ail naoq nail jeq-e jaq-a dai, saol-nvq nail ngaol” dai, ge bhiq-a nail saljial ya-a nail al gaq, aivq nail yaqyov teevq gaq teevq-eel ngaol-aog, laol bhiq nail khi ngaol. ¹⁹ Khul khi mail dai ngal-aq neq, Miqyail

tsaol-aq bhai bhi doevq kovq lal nia nail ngaol dai, aivq neema thaqtsaol nail ngaol. Maldil ge haq neq, Ilcav sil jel-a nail gaoq ya kovq-a nail khe-ai, dul nail ngaol.

²⁰ Ilcav neema thaqtsaol nail ngel-i mail, “Nulnq nvq gaq yaqhao geeqlaoq ya dei-eiq” dai, Yaqkov khi llsaol bhai geeqlaoq bivq-a nail ngaol.

²¹ Yaqkov neema thaqtsaol nail ngel-i mail, aivq sil nail aqjail jail lal-u phao, Yaolsai nail yaqyov nvq gaq bhai geeqlaoq bivq-a nail ngaol. Aivq aivq nail joiqniovq bhai gaqhal khi Miqyail bhai uqhuq thaoq-a nail ngaol.

²² Yaolsai neema thaqtsaol nail ngel-i mail, aivq sil nail aqjail jail lal-u phao, llsaqlaiqlal tsaol-aq Iljiltuv milkhaoq lavqkhoel nee ya dovai nail ganl ge bhi khi, aivq nail haq eeq bhai khalhai ya duq phee q nail ganl iqsanl, ge bhiq-ail ceevq-a nail ngaol.

²³ Molseiq nail aqbhu aqma neema thaqtsaol nail ngel-i mail, Molseiq doevq lee-u phao, bhala hail heeq bhee dai tsu-uvq-ai tha q nail ngaol. Khul khi mail dai ngal-aq neq, yaqyov al gaq al jaiq-ail meeq nail bhai aqyu nvq maolyaq ya moel-a nail ngaol. Aqyu nvq gaq heeqphaq-i mail daoq bivq-ai tha q nail bhai maq geesil-ail.

²⁴ Molseiq neema thaqtsaol-a nail ngel-i mail, aivq eeq lal-u phao, heeqphaq Phaqlaol nail yaqmiq nail yaqyov dai khul nail bhai, aivq maq hav bhoel-ail. ²⁵ Oeqbal lavqkhoel-ai teevq yang lavqkhiq ya tsail nail nee maqtsil, Miqyail nail yaq juq nee mail khoeq nail jiovq nail pha q bhai daq movq nail ngaol. ²⁶ Khali nail haqbhoil khoeq nail jiovq nail bhai ya daq nail pha q

neq, Iljiltuv milkhaoq nail phul heel nlmaoq nee maqtsil phoiq jaiq nail ngaol dai, aivq noe q nail ngaol. Khul khi mail dai ngal-aq neq, aivq neq, yaqhao khe ya nail kovpavq bhai heldaiq cov-ai tha q nail ngaol. ²⁷ Aivq neema tha qtsaol-a nail ngel-i mail, heeqphaq Phaqlaol neema phail nail bhai maq geesil dai, Iljiltuv milkhaoq nee dov ail-a nail ngaol. Khul khi mail dai ngal-aq neq, maq moel kivq nail Miqyail bhai moel-a nail khe-ai, ivqdao dai, jaol nail ngaol. ²⁸ Molveiq neema tha qtsaol-a nail ngel-i mail, iqmoeq ilmoeq doevq lee-a nail yaq juq bhai heivq nail gaq Ilsaqlaiqlal tsaol-aq bhai maq ya heivq dai, Bhaqsaqkhaq bhaoqaiq lav sav khi, gov bhaq bhai aqsivq ya leivq-a nail ngaol.

²⁹ Ilsaqlaiqlal tsaol-aq neema tha qtsaol-a nail ngel-i mail, gee lee del deel milkhaoq bhai tsao nail khe-ai, neltsaiq deel iqyaq iqma bhai ceiv-a nail ngaol. Thailhai ngaol-aq, Iljiltuv tsaol-aq alhai ceiv lai thailthaiq-u phao, ulcuvq-i mail deq phee q heivq gil-a nail ngaol.

³⁰ Ilsaqlaiqlal tsaol-aq neema tha qtsaol-a nail ngel-i mail, Yeiqlilkhoh meenq bhai sivq n tsao jaoq gaq-u phao, meenq nail khainl gaq peiv gil-a nail ngaol.

³¹ Laqhal dai khul nail maimaqlal al gaq neema tha qtsaol-a nail ngel-i mail, Miqyail nail daoq maq naldaiq nail tsaol-aq nee mail maq ya luq maq ya seil-ail-al. Khul khi mail dai ngal-aq neq, aivq khoiq heldaiq lee-a nail Ilsaqlaiqlal tsaol-aq juq bhai hav-a nail ngaol.

³² Al ovqtavq, ngal khul pha q gaoq ge heeq. Khul khi mail dai ngal-aq neq, Gildoq, Bhaqyail,

Saqsoq, Yeiqphaqtav, Daqbhil, Saqmeqlal khi Miqyail nail haqbhoil gedan nail juq nail ganl bhai maq ge bhiq gil tsaol-il. ³³ Tsaol-aq al juq neema thaqtsaol nail ngel-i mail, yu nail milkhaoq bhai gaq lai-a nail ngaol. Tsaq nail daol nail lavqkhoel nee uvthaiq nail ngaol. Miqyail-i mail daoqma saljial jaq-a nail khe-ai, ya-a nail ngaol. Allaqjaqsil nail moeqthaoq bhai iqsanl nieivq cuvq-a nail ngaol. ³⁴ Aqyu juq neema thaqtsaol nail ngel-i mail, mao-ail bhaol nail miqjaq bhai iqsanl lav miv-a nail ngaol. Thaoma-i mail tsil heivq nail khi bhai ya jel ail-a nail ngaol. Gaq bhaq khi ngaol-aoq, gaq kav lal-a nail ngaol. Genl dev-u phao, gaq kav lal-a nail ngaol. Yu nail meenq khe genl dev nail juq bhai the kovq gai-aivq-a nail ngaol. ³⁵ Yaqmai-aq teevq gaq ganav juq neq, sil thaq nail aqyu juq nail aqivq jaqbheq juq doevq kovq lal nail bhai gaoq ya hav kovq-a nail ngaol. Tsaol-aq teevq gaq ganav juq neq, meeq jaiq nail doevq kovq lal nail pha q bhai ya nia dai, yu-i mail phai dov bhiq nail bhai maq oil mail, khoeq nail jio vq nail pha q bhai daq khi sil-a nail ngaol. ³⁶ Tsaol-aq teevq pav ganav juq, yu aqyu juq bhai khal nl movq-ail nl bhi khi, deeq nail bhai ya daq-a nail ngaol. Teevq pav ganav juq bhai hailcav-i mail pheethaiq khi thaonq bhai laol nail bhai iqsanl ya daq-a nail ngaol. ³⁷ Yu-i mail lovmav liv nail, leq-i mail leq heivq nail khi, thaoma-i mail tsil heivq nail bhai aqyu juq ya daq-a nail ngaol. Aqyu juq neq, al jaiq-ail haq nail pha q, khoeq nail jio vq nail pha q khi haq dee aoq deede e nail pha q bhai, ya daq-a nail lavqkhoel, yaol nail

bavkov khi civqmeiv nail bavkov doi khi, teevq dao nee teevq dao tsao tsao-ail jaol-a nail ngaol. ³⁸ Agyu juq haqtsoiq haqyal bha tsaol laivq khi jaol lai-a nail ngaol. Lovphail khaoq bhaoq khi khaq duq bhai tsaog uvq tsaog uvq-ail jaol-a nail ngaol. Agyu juq meeq nail jaq nail ngel-i mail, miltsaq niil agyu juq bhai maq geel-nvq-ail.

³⁹ Tsaol-aq al juq yaoq gaq yaoq-ao nee neema thaqtsaol nail ngaol dai, Miqyail salkhil khanq-ai thaq nail ngaol. Thailhai ngaol-aoq, daoqma saljial jaq-ai thaq nail khe-ai agyu juq maq ya haq-al. ⁴⁰ Khul khi mail dai ngal-aq neq, Miqyail ngadao juq nail haqbhoil meeq jaiq nail pha q lav sav-ai thaq nail ngaol. Ngadao iqsanl maq aol lai haq neq, agyu juq bhee lal nail pha q bhai maq ya nia-ail haq-al.

12

Miqyail aivq nail yaq juq bhai cavq bhiq cov bhiq nail ganl

¹ Neema thaqtsaol nail ganl salkhil khanq nail tsaol-aq al juq ngadao nail teevq jaoq jaol bhee-ai thaq nail ngaol. Alheel ngel-i mail, ngadao bhai lav tsoiq lal nail yaoq pha q yaoq-ao nee bhai khaonq ha-ail ceevq bhel. Ngadao bhai leel thaiq-ai thaq nail oeqbal iqsanl bhai pheel ha-ail ceevq khi, ngadao nail sivtavq bhai lav sav-ai thaq nail gailkhaol bhai neema ivqdao dai thaq khi, tsaol-aivq bhel. ² Tsaol-aivq-u phao, Yeiqsul bhai heldaiq cov-ai thaq yaoq. Aivq neq, ngadao neema thaqtsaol nail pha q bhai iqmoeq ilmoeq khe bhi bhee lal nail gaq ngaol. Aivq

nail sivtavq bhai jiaiv nail lavqkhiq tsail nail pha q bha q da nee, haqsil nail pha q bhai ma q saol-nvq dai, lavqyavq kovtavq-ai khanq sil-a nail ngaol. Niil aq-il, aivq Miqyail nail doiqbev bev ma nail lavqmal phao jaoldeel-nvq tha q nail ngaol. ³ Aivq bhai neejiav jiaiv nail oeqbal ya q juq aivq bhai khal nl movq-ail nl bhiq-u phao, aivq oltsaol nail bhai saol-nvq daiq yaoq dei-eiq. Alhai saol-nvq dai haq neq, ga q ma q bha q nail nee ovqtavq, neema iqsanl ma q cov-ail.

⁴ Nuljuq oeqbal nee dev pheel ja q nail ngaol. Thailhai ngaol-a oq, aqsivq dov lee-u kev dai, ma q khanq daiq haq-al. ⁵ Aqbhu ya qyov juq bhai cavq bhiq cov bhiq nail khe-ai, Miqyail nuljuq bhai cavq lavq cov lavq nail daoq bhai nuljuq nioil peivq ail-a oq nail lai q. Aivq ge nail:

“Nga q nail ya qyov-ol,
Heeqpha q Miqyail-i mail
cavq lavq cov lavq nail bhai
aqmeeq-ai naldai q ya oq.
Aivq nao q bhai kha q kha q-ail
cavq lavq cov lavq-u phao,
neema tha q cov.

⁶ Khul khi mail dai ngal-a q neq,
Miqyail neq,
aivq gai q-a nail tsaol-a q bhai
cavq bhiq cov bhiq khi,
aivq-i mail
khal hav bhoel nail ya q
yao q ga q yao q-ao nee bhai
deeq deeq-ail, cavq bhiq
cov bhiq nail ngaol” dai,
ge-ai tha q nail ngaol.

⁷ Nuljuq-i mail haq nail aoq nail pha q ya daq nail neq, Aqbhu Miqyail-i mail cav lavq cov lavq nail pha q bhai ya nail pha q pevq nail ngaol. Aqbhu yaqyov juq bhai nl bhiq nail khe-ai, Miqyail nuljuq bhai nl lavq nail ngaol. Khul khi mail dai ngal-aq neq, aqbhu maq cavq maq cov bhiq nail yaqyov maq jaol-ail. ⁸ Yaq juq iqsanl mail cavq bhiq cov bhiq nail bhai ya daq nail khe-ai, nuljuq maq ya daq haq neq, nuljuq aivq nail yaq maq ngel-ail. Govbha lavqniil khe yaq ngaol. ⁹ Al ovqtavq, ngadao bhai cavq lavq cov lavq nail dai khi, aqsivq haqjoil phao aqbhu juq jaol nail ngaol. Ngadao aqyu juq bhai ev nail ngaol. A dai nee maqtsil, aqdoevq doevq nail pha q ya dai, aqhaqlal phao khe Aqbhu nail kov-uvq bhai aqmeeq-ai ya jaol nail ngaol. ¹⁰ Aqsivq haqjoil phao khe ngadao nail aqbhu neq, aqyu juq neema tsaq nail khe-ai teevq yanq lavqkhoel taivq-ail, ngadao bhai cavq lavq cov lavq nail ngaol. Thailhai ngaol-aoq, Miqyail neq, aivq meeq nail haol nail khe-ai, ngadao iqsanl meeq lal haol lal dai, ngadao nail haqbhoil aqmeeq pha q saol-nvq khi, cavq lavq cov lavq nail ngaol. ¹¹ Cavq lavq cov lavq nail yaoq pha q yaoq-ao nee bhai ya daq-u phao, lavqkhiq tsail nail pha q maq ngel-ail, noe qha q nail pha q jiav nail ngaol. Thailhai ngaol-aoq, cavq lavq cov lavq-a nail pha q bhai ya daq-a nail tsaol-aq nail haqbhoil, yaqhao tsaq nail daol nail khi neesal-ovq nail pha q ya nail ngaol.

Miqyail nail geeqlaoq bhai tha q khaonq ha

¹² Alheel ngel-i mail, gaq maq aol nail nuljuq nail aqlavq gaoddil khi, gaq maq aol nail nuljuq nail peevqceevq gaq bhi aol kovq lal yaoq.

¹³ Aqkhil maq meeq nail tsaol-aq, khil ceevq maq ya pov-ail mail cavq lai dai, nuljuq nail aqkhil nail haqbhoil gailkhaol daolcoev dai, lav daol yaoq.

¹⁴ Tsaol-aq yaq iqsanl nee tsaq lai jil lai dai, laijai yaoq. Meeq lal haol lal dai iqsanl, laijai yaoq. Khul khi mail dai ngal-aq neq, maq meeq maq haol nail khul gaq maqkhaiq, Miqyail bhai maq ya moel-ail. ¹⁵ Nuljuq nail lavqkhoel tsaol-aq teevq gaq ganav Miqyail nail geeqlaoq eeljaol maq ya-ail maq ya pevq-ail dai, yaolphaol yaoq. Aqkhaq khaq deede nail aqbhaol meeq lal khi, aivq nail dovq-i mail tsaol-aq maodai bhai lav bheeq lav leel nail khe-ai, tsaol-aq teevq gaq-ail alhai maq ya pevq-ail dai, yaolphaol yaoq.

¹⁶ Ilsaol neq, yaqyov aqivq pevq khi ngaol-aog, aog teevq bhaol-i mail aivq nail alyaq phal jaq-a nail ngaol. Aivq khe-ai thaq khi. Aivq neq, khaqmiq iqsanl sev, Miqyail bhai iqsanl maq ev nail tsaol-aq ngaol. Alheel nail tsaol-aq teevq gaq-ail nuljuq nail lavqkhoel bhai maq ya dov lal dai, yaolphaol yaoq. ¹⁷ Nuljuq heeq nia nail khe-ai, aivq bhai geeqlaoq bivq nail bhai Ilsaol oil movq lal bhiq-u phao, khaonq ha nail bhai ya daq-a nail ngaol. Maivbhil dov dov-ail mailma-ail hal khi ngaol-aog, noeqpov nail aqyanq maq jiav-ail.

¹⁸ Nuljuq nail aqphiq aqbhal juq khe-ai, aqlavq iqsanl thoiqtsi nia khi miqjaq iqsanl tovg nail Silnaq gaoqjaoq bhai nuljuq ail kev-a nail maq

ngel-ail. Gaoqjaoq al jaoq neq, navtsee dai pevq khi, al nail teevq jaoq bhai nqdil uvthaiq-ai thaq nail nee ovqtavq, lilmoel lil ma bhoel nail ngaol. ¹⁹ Nqbho jiiiv nail aqthel khi daoq ge nail aqthel dov lee nail gaoqjaoq pevq nail ngaol. Ilsaqlaiqlal tsaol-aq juq neq, daoq al daoq bhai haoqnao teevq pov ma ya gaiq nail haqbhoil, Molseiq bhai hal-a nail ngaol. ²⁰ Khul khi mail dai ngal-aq neq, jaiqyaq iqsanl gaoqjaoq bhai thaog tuv lal haq neq, lovmav-i mail liv heivq yaoq dai, bivq-ai thaq nail daoq al daoq bhai, aqyu juq maq khanqtsaol-ail. ²¹ Al juq bhai ya moel-u phao, mao-ail geesil lal nail ngel-i mail, "Ngal gee iqsanl geesil, aqjuq iqsanl juq deedeel nail ngaol" dai, Molseiq ge nail ngaol.

²² Thailhai ngaol-aog, nuljuq Yeel-ovq gaoq-jaoq bhai lal kev-ai thaq nail ngaol. Gaoqjaoq nil jaoq neq, aqdoevq doevq nail Miqyail nail meenq ngaol. Nqtavq kovtavq khe Yeiqulsaqlaiq meenq iqsanl ngel nail ngaol. Maq ge gil tsaol nail nqtavq gaqkhoel juq lavqkhiq teevq tsail jil lai duq iqsanl, ngel nail ngaol. ²³ Nqtavq kovtavq khe haoqgavq phaldoiq lavqkhoel-ai aqmil gevq bhoel-ai thaq nail iqmoeg ilmoeq doevq lee-a nail tsaol-aq juq jil lai duq iqsanl, pevq nail ngaol. Tsaol-aq iqsanl bhai yalkhaq dal nail Miqyail nail jaol duq iqsanl pevq nail ngaol. Bhee lal-a nail tsaq nail daol nail tsaol-aq nail aqhaqlal iqsanl al bhai jaol nail ngaol. ²⁴ Daoqma saljial aqsivq nail tsaolkhaiq Yeiqsul iqsanl jaol nail ngaol. Aqbheiqalal nail aqsivq daoq ge nail nee maqtsil, hoel ha-ai thaq nail Yeiqsul nail aqsivq al, mao-ail meeq nail daoq ge nail ngaol.

²⁵ Nuljuq bhai daoq ge lavq nail Miqyail nail daoq bhai naldaiq nail tsaol-aq pevq yaoq. Khul khi mail dai ngal-aq neq, miltsaq kovtavq bhai cavq lavq cov lavq nail Molseiq nail daoq bhai maq naldaiq-a nail ngel-i mail, maq ya jel ail-a nail ngaol. Thailhai phal-iq neq, nqtavq nee mail cavq lavq cov lavq nail Miqyail nail daoq bhai ngadao khaonq ha haq neq, teevq thal-iq maq ya jel-ail. ²⁶ Aq-u phao, aivq nail aqthel-i mail miltsaq bhai bhi luv lal-a nail ngaol. Thailhai ngaol-aq, niil aq-il aivq-i mail saljial jaq-ai thaq nail neq, “Ngal miltsaq bhai teevq pov gaoq bhi luv lal nail nee ovqtavq, nqtavq bha iqsanl bhi luv lal nail ngaol” dai, jaq-ai thaq nail ngaol.

²⁷ Teevq pov gaoq bhi luv lal naol dai, ge-ai thaq nail neq, maq luv lal nia nail juq neq khaq mao iqsanl ivqdao dai jiaiv khi, luv lal nia nail juq neq, oil haq nail ngaol dai, ge movq nail ngaol. Luv lal nia nail al juq neq, teivq-ai thaq nail juq ngaol.

²⁸ Kaovciv maq dao lal nia nail milkhaoq ngadao ya thaq-ai thaq nail ngel-i mail, Miqyail bhai tsiqeeq bhel. Ev khi, geesil nail lavqkhoel, Miqyail neema tsaq nail khe-ai, aivq bhai uqhuq thaog bhel. ²⁹ Khul khi mail dai ngal-aq neq, ngadao nail Miqyail neq, poiv jaq thailthaiq nail migjaq pevq nail ngaol.

13

Miqyail neekhaol sil dai nl nail ganl

¹ Aqivq jaqbheq Khali yaq bhai khaq mao iqsanl gaiq-a yaoq. ² Maq nioil peivq dai, daq-i

bhai aqmeeq-ai hav yaoq. Khul khi mail dai ngal-
 aq neq, tsaol-aq teevq pav ganav juq daq-i bhai
 hav-u phao, aqyu juq maq heeq nia-ail, nqtavq
 gaqkhoel bhai hav ya-a nail ngaol. ³ Nuljuq
 thaonq bhai aol nail tsaol-aq nee mail aol nail
 khe-ai, saol-nvq-ai thaq khi, aqyu juq bhai thaq
 nioil peivq. Nuljuq iqsanl, aqsivq haqjoil phi-nq
 thaq nail ngel-i mail, khoeq nail jiovq nail bhai
 ya daq thailthaiq nail tsaol-aq bhai thaq nioil
 peivq.

⁴ Tsaol-aq iqsanl mail hevq pheel maol pheel
 jaq nail pha q bhai thaqeeq yaoq. Miqyaq
 khaqma nail gaiqlaq bhai saljial ya ivq nail
 ngaol. Khul khi mail dai ngal-aq neq, khaqmiq
 sev nail tsaol-aq khi yu nee bheeq nail leel
 nail tsaol-aq bhai Miqyail dal bhiq nail ngaol.
⁵ Phul heel oil movq nail neema taivq-ail aol khi
 aqdoevq thaq doevq. Nuljuq khal jia v nail juq
 bhai neekhaol sil yaoq. Khul khi mail dai ngal-
 aq neq,

“Ngal naoq bhai teevq thal-iq
 maq gaoq maq gail ail.
 Teevq thal-iq
 maq khaonq ha-ail” dai,

Miqyail ge-ai thaq nail ngaol.

⁶ Alheel ngel-i mail,
 “Heeqphaq Miqyail neq,
 ngaq bhai heldaiq
 phail nail gaq ngaol.
 Ngal khul teevq pha q
 bhai iqsanl
 geesil nail maq jia v.
 Tsaol-aq ya q ngaq bhai

khul khi nia nail-aiq” dai,

ngadao geesil nail neema maq aol nail lavqkhoel nee ge kivq nail ngaol.

⁷ Nuljuq nail kovtavq bhai aqivq jiovg khi nuljuq bhai Miqyail nail daoq cavq lavq cov lavq-a nail juq bhai thaq nioil peivq. Aqyu juq aqdoevq doevq-u phao, nl-a hal-a nail juq bhai nuljuq saol-nvq khi, aqyu juq nail neema thaqtsaol nail pha q bhai saol oil yaoq. ⁸ Yeiqsul Khali neq, teevq thal-iq maq phal lal-ail, aivq neq, milgaol, yanqgaol khi nqmaq maqluv halyeel teevq pha q ngaol.

⁹ Maq dul lai nail, maodai pha q cavq lavq cov lavq nail haoqnao tha q tsaothe. Miqyail nail geeqlaoq eeljaol bha qda nee, neema ivq lal ha q neq, meeq deede e nail ngaol. Ja q nail daol nail aol tha oq nail bha qda nee mail neema ivq lal-a nail ma q ngel-ail. Ja q nail daol nail aol tha oq nail tsaol-aq, al nail lavqkhoel nee geeqlaoq ma q ya-ail. ¹⁰ Ngadao laol duq teevq dao jia v nail ngaol. Saiqgov gov ma lavqkhoel-ai ganl nl nail Philma juq, al bhai laol bhiq-ai tha q nail pha q* bhai ma q ja q kha oq-ail.

¹¹ Philma aqivq ga q neq, meeq dee haol deede e nail jaol duq lavqkhoel jaiqya q nail aqsivq tsiq bhoel laivq khi, oeqbal tsiqhaol nail haqbhoil laol bhiq lai-a nail ngaol. Thailhai ngaol-a oq, laol nail haqbhoil heivq-a nail jaiqya q nail aqmaol neq, laolkhoiq lavq niil phao ya kheq ha q nail ngaol. ¹² Alhai dul dai, Yeiqsul iqsanl aivq nail

* **13:10** 13.10 Laol bhiq-ai tha q nail al neq, Yeiqsul nail aqmaol pevq nail ngaol.

aqsivq-i mail tsaol-aq yaq bhai bhi meeq bhi haol lai nail dai khi, laolkhoiq lavq niil phao khanqsil-a nail ngaol. ¹³ Yu-i mail khal nl movq-ail nl bhiq nail bhai Yeiqsul daq-a nail khe-ai, ngadao iqsanl daq daq-ail yu jaol nail jail-nq nee, Yeiqsul jaol nail phao dov-ail bhel. ¹⁴ Khul khi mail dai ngal-aq neq, niil yeel bhai doevq-u phao, ngadao nail ivq nail meenq maq jiav-ail. Yaqhao khe jiav lee nail meenq bhai ngadao noeqthunq-ai thaq khi halpov thailthaiq nail ngaol.

¹⁵ Alheel ngel-i mail, ngadao Yeiqsul bhai juq khi, Miqyail bhai tsiq eeq nail pha q khaq mao iqsanl laol bhiq bhel. Alhai laol bhiq nail neq, ngadao nail moeqthaoq-i mail aivq nail aqmil bhai tsiq eeq nail bhai ge nail ngaol. ¹⁶ Aqmeeq pha q teevq gaq nee teevq gaq tsojao-ai bhi nail pha q bhai maq nioil peivq dai, nl yaoq. Khul khi mail dai ngal-aq neq, al neq, Miqyail neema tsaq nail laol bhiq nail pha q pevq nail ngaol. ¹⁷ Nuljuq nail kovtavq bhai aqivq jio vq nail juq nail daoq naldaiq khi, aqyu juq nail kov-uvq bhai aqmeeq-ai jaol yaoq. Khul khi mail dai ngal-aq neq, aqyu juq-i mail nl-a hal-a nail ganl aqyu juq Miqyail bhai ya ge bhiq lai nail ngel-i mail, aqyu juq nuljuq bhai nqkiv n-gaol maqkhaiq, heldaiq phail nail ngaol. Aqyu juq alhai heldaiq phail-u phao, noeqhaq nail pha q maq jiav dai, lavqkhiq teevq tsail nl nia hal nia dai, aqyu juq nail daoq aqmeeq-ai naldaiq yaoq. Maq naldaiq haq neq, nuljuq nail haqbhoil teevq pha q-ail ganl maq tsoiq-ail.

¹⁸ Ngaq nail haqbhoil geeqlaoq hal lavq yaoq. Ngaq nail heeq kivq nail neema maq lai q maq

tsa-ail dai, ngal heeq kivq naol. Khul khi mail dai ngal-aq neq, ngal khaq mao iqsanl aqmeeq pha q taivq-ail nl movq-ail nial. ¹⁹ Ngal nuljuq jaol nail bhai lavqtsail mail kovq lal nia dai, geeqlaoq hal lavq yaoq dai, ngal nuljuq bhai hal deede nail ngaol.

Geeqlaoq bivq khi haoqnao naosaq khe daoq

²⁰ Neesal bhi ovq nail Miqyail, nqmaq maqluv halyeel ivq nail daoqma saljial nail aqsivq bhi dov lee-a nail bhaqda nee, ngadao nail Heeqphaq Yeiqsul bhai bhi doevq kovq lal-a nail ngaol. Yeiqsul neq, mao-ail eeq nail yaol lovq nail gaq pevq nail ngaol. ²¹ Neesal bhi ovq nail Miqyail al gaq, nuljuq bhai, aivq neema tsaq nail khe-ai, aqmeeq pha q yaoq pha q yaoq-ao nee nl nia nail tsaol-aq bhi pevq lal dei-eiq. Yeiqsul Khali bhaqda nee, Miqyail nail neekhaol teevq sil nl nail tsaol-aq, aivq nuljuq bhai bhi pevq lal dei-eiq. Yeiqsul Khali bhai nqmaq maqluv halyeel tsiqeeq bhel. Aqmiq.

²² Aqivq jaqbheq juq-ol, ngal nuljuq bhai haoqgavq davqnil nil dai, gevq bhoel-ai lavq-a nail ngaol. Ngal nuljuq bhai gaq bivq nail daoq bhai ol khi naldaiq yaoq dai, ngal nuljuq bhai hal nail ngaol.

²³ Ngadao nail jaqbheq Tilmolseiq bhai yu thaonq nee phaiq dov gaq-ao nail ngaol dai, nuljuq bhai bhi heeq kivq movq nail ngaol. Aivq lavqtsail mail lal kev haq neq, ngal iqsanl aivq nee mail nuljuq jaol nail bha lal khi mail, nuljuq bhai ya moel nail ngaol.

²⁴ Ngal nuljuq bhai noeq moel naol gaiq-a naol dei-eiq, nuljuq nail kovtavq bhai aqivq jiovq nail juq iqsanl bhai khi Khali yaq juq iqsanl bhai ge bhiq ail dei-eiq. Niai jaol nail Iqtaqliq milkhaoq khe aqivq jaqbheq juq iqsanl, nuljuq bhai noeq moel naol dai, daoq cavq cavq bhoel-ai lavq-a nail ngaol.

²⁵ Nuljuq iqsanl nail kovtavq bhai geeqlaoq eeljaol bhi jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 13 Jul 2024 from source files
dated 29 Jan 2022

aaaba9fd-8172-55cc-ad15-906f43ddb5a5